

**Surat neu
atoin Ibranis sin
re' fe' nasaitan sin be'i-na'i sin
rais pirsait
he npirsain neun Yesus Kristus**

*Uisneno nreek haefan In Anah, re' ma'tani'
nneis na'ko In mafefa' ahuunt ein*

¹ Un-unu' te, Uisneno anpaek In mafefa kniun' ein he na'uab ein nok hit be'i-na'i atoin Ibranis sin.* Sin npaken cara huma'-huma' he na'uab ein fani-fani nok sin.† ² Mes oras ia, In nreek haefan anrair In Anah he na'uab nok kit.

Na'ko un-unu', Uisneno npiir ma nbetis In Anah re' ia,

he naprenat nabu-bua nok Ne.

Oras In nmoe' neno tunan ma pah-pinan, ma in afan-nesan sin ok-oke',

In Anah naan anmoe' sin nabu-bua nok Ne msa'.

³ Uisneno In Anah re' ia, nakrira' ma naruru' In Aamf ee In pinan ma krahan,

* **1:1** a: Kata *Ibrani* ia, kanaf es antein neu uuf ma pah Yahudi. Atoin Yahudis re' anpirsain neun Yesus Kristus, atoni' anteek sin ite nak, "atoin Kristen Ibranis", natuin sin a'teta' na'ko sin aok-bian Yahudis sin re' annaa' atoran rais pirsait Yahudi mnaa' fe'. † **1:1** b: Uisneno natoon In rais manba'an sin, anpaek cara huma'-huma'. On re': In natoon neu ka'o Abraham anpaek nahake' rais manba'an, neu ka'o Musa anpaek atoran rais pirsait, neu nai' Daut anpaek siit pures-bo'is, neu nai' Yermias anpaek uab manfirin ma man'isa'.

nahuum on re' maans ee ntoom ninu rarit
nabaans on.

Fin In tuan ee masaf mese' on re' In
Amaf.

Na'ko In Kabin ma Prenat re' ma'tain re'uf,
In nanaob sin ok-oke' anbi neon goe tnanan
ma pah-pinan.

In nfei eno'-ranan,
he nnoes nain mansian ii sin saant am penu
sin,

maut he nakninu' sin.

Rarit In ntebi nfain neu sonaf neno tunan,
he ntoko nbi Uisneno In abnapan a'ne'u,
anbi bare' re' mahormata' anneis-neisi.

*Uisneno In Anah re' ma'tain re'uf, anneis na'ko
ameput sonaf neno tunan sin*

⁴ Uisneno In ameput sonaf neno tunan sin ro
ma'tain ein. Mes In Anah ma'tain re'uf, anneis
na'ko sin ok-oke'. Uisneno In pangkat es re'
a'raat re'uf. Ma In nfee In pangkat naan neu In
Anah. Etun In Anah, anneis nain In ameput ein
sonaf neno tunan.

⁵ Uisneno na'uab niit neu In Anah naan am
nak,

“Neno ia, Au usaeb 'piru'-baru he Ho mnaa'
aprenat.”[☆]

Uisneno na'uab antein am nak,
“Au re' ia, In Amaf.

Ma In re' ia, Au Anah.”[☆]

Uisneno na'uab nain on naan anmatoom nok
In Anah, mes In ka na'uab niit fa on re' naan
anmatoom nok In ameput ein sonaf neno tunan.

[☆] **1:5** Siit Pures-Bo'is sin 2:7 [☆] **1:5** 2 Nai' Samuel 7:14, 1 Mape'o
'Naof Pah Isra'el ma Pah Yahuda 17:13

6 Oras Uisneno anreek ma nsonu' In Anah ma'tain re'uf naan ate, In naprenat In ameupt ein sonaf neno tunan amsa' am nak,
 “Ameupt ein ar-arki!

Hi ro he mhormaat,
 ma mi'besan Au Anah!”[☆]

7 Uisneno na'uab anmatoom nok In ameupt ein sonaf neno tunan am nak,
 “Au 'moe' Au ameupt ein sonaf neno tunan,
 anjarin rabah on re' anin.

Au 'moe' Au ate sin,
 anjarin ma'tani' on re' ai.”[☆]

Uisneno na'uab on naan, natuin sin re' naan, suma aan renu'-aan reek ahaa.

8 Mes In na'uab anteni' neu In Anah naan aa kuun am nak,
 “Ho re' ia, Uisneno.

Ho of amtoko mbi 'toko prenatal tar antea nabar-baar.

Ho of amnaa' kuasa he muprenat nok neek anneot ma ammonot.

9 Ho nekam naan anmariin oras Ho mkius tuaf-tuaf anmoni mne'o ma namnoon.

Mes Ho nekam naan ansuus oras Ho mkius tuaf-tuaf re' a'moink ein anbeon ma npe-nun.

Etun Ho neekm aan anmariin,
 he Au 'oop mina' 'eu Ho 'nakam,
 he usaeb 'piru'-baru he Ho mjair Usif re' Ho ma'tanim amneis mu'ko biak ein.”[☆]

10 Uisneno na'uab antein neu In Anah am nak,
 “Anah!

[☆] 1:6 Surat re' Nareta' Nafani' Raan A'honis 32:43, Nai' Lukas 2:13-14 [☆] 1:7 Siit Pures-Bo'is sin 104:4 [☆] 1:9 Siit Pures-Bo'is sin 45:7-8

Ho re' ia, Usif re' naprenat nain na'ko afi unu'.

Ho re' ia, es re' amreun he neon goe tnanan anjair nain.

Ho re' ia, es re' muprenat he pah-pinan anjair nain.

11-12 Neon goe tnanan ma pah-pinan of anpunu nmaten.

Neon goe tnanan ma pah-pinan of nam-nekun nkonon.

Mes Ho kuum ammoin mubar-baar.

Ho of mait imporin neon goe tnanan ma pah-pinan,

nahuum on re' tuaf nait inporin tai pake re' nakroe re'-re'uf.

Ho of amsenu' ma mseka' neon goe tnanan ma pah-pinan,

nahuum on re' tuaf ansenu' ma nseka' tai paek fe'u.

Mes Ho kuum ka on fa naan.

Natuin Ho mmoin mubar-baar.”✧

13 Uisneno na'uab antein neu In Anah am nak, “Anah!

Uum he mtoko mbi ia, ambi bare re' mahormaat re'uf,

ambi Au bnapak a'ne'u re' ia.

Au of a'moe' Ho muusn ein,

tar antea na'ruir ein ma nhuum fousun neun Ko.”✧

Uisneno na'uab nain on naan anmatoom nok In Anah, mes In ka na'uab niit fa on re' naan anmatoom nok In ameupt ein sonaf neno tunan.

14 In ameupt ein, pentiing amsa'. Fin In nhaefa'

✧ 1:11-12 Siit Pures-Bo'is sin 102:26-28 ✧ 1:13 Siit Pures-Bo'is sin 110:1

sin, he nnaon n'urus Iin na ok-oke', re' In he nsoi nafetin naan sin na'kon sin sanat ma penu sin. Maski on naan amsa', mes Uisneno In Anah anneis-neis na'ko sin ok-oke' fe'.

2

Kais amtorak Uisneno In beno 'honis re' ma'tain re'uf

¹ Natuin Uisneno In Anah ma'tani nneis na'ko mafefa kniun' ein, ma na'ko ameupt ein sonaf neno tunan, hit ro he tnaa' tahe-heran saa' re' hit tneen ma tatniin atrair, he hit kais atnikan tain sin. ² Unu' te, Uisneno npaek In ameput na'ko sonaf neno tunan, he natoon In rais manbaa'n ein neu hit be'i-na'i sin. Rais manbaa'n ein naan ro batuur. Karu sin ntanhai In apreent ein re' naan, sin ro he napenin hukun natai nok sin sanat. ³ Batuur, unu' te on naan. Mes oras ia, Uisneno In Anah, anfei nrair raan fe'u he nsoi nafetin mansian ii. In nakrira' ma naruru' raan a'honis re' reok re'uf naan neu In tuaf re' antuthae Je anbi pah-pinan ia. Rarit sin natoon kit he hit tpirsai. Mes karu hit ka ttoe tatuin fa te, hit tamre'u tkoon nai! ⁴ Fin Uisneno anfee kuasa msa' he sin nmo'en rasi mkakat ma sanmakat huma'-huma'. In nasanut In Asmanan neu sin imsa', he sin nmo'en rasi mfaun bian natuin In romin. Nok rasin naan ok-oke', etun hit tahiin tak, raan a'honis naan, ro batuur. Onaim hit ro he tfairoir je!

Nansaa' am es Uisneno In Anah na'paran In tuan anjair mansian?

⁵ Au u'uab anmatoom nok pah-pinan mamaas fe'u re' of he nboor neem. Mes Uisneno ka

natoon niit fa neu In ameupt ein sonaf neno tunan nak, sin of es re' an'urus pah-pinan mamaas fe'u naan. Natu'in mansian ii es re' of an'urus. ⁶ Anbi Uisneno In Suur Akninu', ka'o Daut nataan niit anmatoom nok mansian ii in pangkat am nak,

“Uisneno!

Nansaa' am es Uisneno mkius munesib meu mansian?

Nansaa' am es Uisneno amneek sin?

Fin sin suma mansian ahaa!

⁷ Mes Uisneno amfeen sin kuasa,

he sin njarin noi huma' mese' on re' ameupt ein sonaf neno tunan.

Uisneno amhormaat sin amsa',
ma mu'ratan sin,

⁸ he sin naprenat are' saa'-saa' re' Uisneno mmoe' sin naan.”[☆]

Onaim tatuin ka'o Daut in surat, Uisneno anmoe' mansian ii njair usif ma a'nakaf, he sin n'urus are' saa'-saa' re' In nmo'e nrair sin. Te kaah, hit ka tiit tiit tain fa mansian es, re' naprenat nain are' saa'-saa' ii, on re' naan.

⁹ Mes anmui' Tuaf es, re' bisa naprenat are' saa'-saa' ii oke'. In re' naan, es re' Nai' Yesus. In neem natua ntahan anbi pah-pinan, ma anjair mansian re' nasaah ha'mu'it tar antea anmaet. In nmaet on re' naan, he nakrira' ma naruru' Uisneno In nekan arekot neu mansian. Rarit Uisneno nboi's Ee ma na'raatn Ee, he In naprenat are' saa'-saa' re' Uisneno anmo'e nrair sin naan.

¹⁰ Onaim pantas karu Uisneno nasahab Nai' Yesus ha'mu'it naan, he Nai' Yesus bisa nfei ma nasoit raan a'honis neu mansian. Fin Uisneno

[☆] **2:8** Siit Pures-Bo'is sin 8:5-7

naim ranan he mansian amfaun bisa nmonin nabu-buan nok Ne anbin sonaf neno tunan. Fin Uisneno es re' anmoe' nain sin ok-oke'. Ma are' kanan amonit, ro nmoin natuin Ee.

¹¹ Karu tuaf re' Nai' Yesus nakninu', Uisneno ro antoup sin nok rek-reko, he sin njarin In aanh ein. Fin Uisneno naan, Nai' Yesus In Aamf amsa'. Nok ranan naan, Nai' Yesus nok In aanh ein, Amaf mese'. Etun Nai' Yesus ka namaeb On fa he no'en sin am nak,

“Hi arki re' ia, Au aok-bian sin kuuk.”

¹² Fin Nai' Yesus natoon neu In Amaf am nak, “Au he utoon 'eu Au aok-bian sin, anmatoom nok Au Ama' Ho arekom! Au he 'sii a'bi sin sonak ma sin atnaank ein, anmatoom nok Ama' Ho ma'tanim!”[☆]

¹³ Nai' Yesus antuut In uaban am nak, “Au 'pesit ma snait 'eu Uisneno piut.”

Nai' Yesus na'uab antein am nak, “Amkius miit, Au es re' ia, ubua 'ok Uisneno In aanh ein, re' In nnona' ma nfee Kau sin, he Au 'urus sin.”[☆]

¹⁴ Uisneno In aanh ein naan, mansian biasa, es naan ate Nai' Yesus ro he njair mansian on re' sin. Fin In ro he njair mansian fe', na' In bisa nmaet. Nok ranan naan, na' In bisa nasiik naan kuasa na'ko niutn ee sin usin. Fin uis maufinu naan, in es re' annaa' kuasa he n'urus rasi anmatoom nok 'maten. ¹⁵ Ma in nmoe' mansian ii namtausan a'maten, tar antea sin natun-tuin ein aah neu ne, on re' ate. Mes oras ia, Nai' Yesus bisa nsoi nafetin sin na'ko sin rasi mtaus naan. ¹⁶ Ro tebe namneo, Nai' Yesus ka

[☆] **2:12** Siit Pures-Bo'is sin 22:23 [☆] **2:13** Nai' Yesaya 8:17,18

neem fa he nturun ma nbaab Uisneno In ameupt ein sonaf neno tunan. Mes In neem he nturun ma nbaab kit, ka'o Abraham in sufan-ka'un sin re' ia. ¹⁷ Nok ranan naan, Nai' Yesus anjair huma' mese' on re' hit re' tjair In aok-bian. Nok ranan naan amsa', In bisa njair hit a'naak rais pirsait re' a'raat re'uf, he nturun ma nbaab kit he tatuin Uisneno In romin. In nakrira' In rais kasian neu kit. Ma In na'uab saa' ate, In nmoe' je on re' naan. Unu' te, hit be'i-na'i sin antoit sin a'naak rais pirsait ein sin a'naak kou' goe, he nmoe' fua'-turu', he Uisneno annoes nain sin saant am penu sin. Oras ia, Nai' Yesus neikn On anjair fua'-turu' he Uisneno annoes nain hit saant am penu sin. ¹⁸ Oras Nai' Yesus anmoni nbi pah-pinan ia, In napein ha'mu'it amfaun. Bian anfuir Ee he nmoe' sanat. Maski on naan amsa', mes In ka nmouf fa. Es naan ate, karu nmui' tuaf re' anfuri kit he tmoe' sanat ate, Nai' Yesus bisa nturun ma nbaab kit he hit kais atmouf teu sanat naan.

3

Uisneno In Anah ma'tani' nneis na'ko ka'o Musa

¹ Aok-bian manekat arki. Uisneno anpiir ma nbetis naan ki, ma nteek ki atoin neek akninu', he hi mmoin mok Uisneno ambi sonaf neno tunan. Natuin rasin re' naan ok-oke', hi ro he mitenab namnuut anmatoom nok Nai' Yesus re' naan. Fin hit tmanaku' trair tak, In re' naan Uisneno In Haef, ma In hit A'naak Rais Pirsait re' A'ratas anneis-neisi msa'. ² Oras Uisneno ansonu' ma nhaef Nai' Yesus, Nai' Yesus anmoe' natuin Uisneno In roimn ein ok-oke'. Nok ranan naan, In njair on re' ka'o Musa. Fin ka'o Musa

anmoe' natuin Uisneno In romin amsa', oras in ntuthae hit be'i-na'i sin unu' naan.☆ 3 Maski on naan amsa', mes Nai' Yesus ma'tani' nneis na'ko ka'o Musa. Fin Nai' Yesus naan nahuum on re' a'naak umi. Namneo, a'naak umi' ma'tani' nneis na'ko ameput anbi umi naan in nanan. 4 Tuaf mese'-mese' nafeen ein ma ntokon umi. Mes Uisneno nafena' ma natoko' nain sin arsin. 5 Onaim ka'o Musa nmoe' natuin Uisneno In romin, oras in njair ameput anbi Uisneno In umi. Fin oras naan, in natoon nain saa'-saa' re' Uisneno of anmoe' sin. 6 Nai' Yesus anmoe' natuin Uisneno In romin amsa', mes In ka aan renu' fa on re' ka'o Musa. Natuin In re' naan, Kristus, Uisneno In Anah re' In nruur ma nreek nain Je na'ko unu', he nsonu' ma nhaef Ee ntaam neem neu pah-pinan ia. Ma Kristus an'urus nahiin batuur-batuur In Aamf ee In uim je nanan. Onaim karu hit tnaa' taheer-heran hit rais pirsait, ma hit tafnekan ma tharap piut teu Kristus, hit bisa ttaam atjair nonot-asar anbi In uim je nanan amsa'.

Kais amkoit misaitan hi rais pirsait on re' be'i-na'i sin, natuin sin ka bisa ntaman ntean fa bare snasat re' Uisneno napaar ee neu sin

7 Natuin rasi naan, hi ro he mpasan ma mtakan hi ruikm ein he mitniin mirek-reko' saa' re' Uisneno In Asmaan Akniun' ee natoon anrari mnak,

“Neno ia, karu hi mneen Uisneno In kabin,

8 hi kais amnaak-faut,

on re' atoin ein naan,

re' annaon neu-mneman tar antea toon bo' haa anbin baer ruman.

☆ 3:2 Surat Sensus 12:7

Fin sin ka ntoe natuin fa nai' Musa,
 tar antea Uisneno msa' he noi,
 ka bisa nsabaar naan fa ntein nok sin.

9-10 Mitenab miit!

Toon bo' haa Au 'moe' rasi mkakat ma sanmakat
 huma'-huma',
 anbi sin humak sin matak, sin sonak ma sin
 atnanak!

Mes sin nsoba' ma na'taka' Kau piut.

Es naan ate, Au uto'on sin am 'ak,

'Hi re' ia, ambaineis re'-re'uf!

Fin hi mkoti mrair Au ranan,

ma mituin hi ranan re' anpeun ma
 nbeo!

11 Au ka 'aran ma 'tahan fa he 'kius hi
 maufinun on naan antein.

Es naan ate, Au 'kaas ki m'ak,

'Hi ka bole fa he mtaam ma misnaas
 mibua mok Kau.'*[☆]

12 Onaim aok-bian arki! Ampaant om, kais-
 kaisa' anmui' tuaf na'ko ki re' anmoe' maufinu,
 tar antea in ka npirsai ntein fa, rarit ankoit ma
 nasaitan Uisneno re' anmoin nabar-baar. 13 Reko
 nneis, ammaha'tanin nekaf piut-piut es nok es,
 ansuun-suun oras. Kais ampao mtein! Natuin hi
 re' naan, karu es napoi ki he mmoe' sanat ate, hi
 mituin rabah. Tar antea hi mi'naak-faut, ma ka
 mtoe mituin fa Uisneno. 14 Hit bisa tjair partei
 ma thaek ha'e mese' tok Yesus Kristus, asar hit
 tafnekan ma tharap piut-piut teu Ne, nahuum on
 re' neno hit fe'e tmurai tpirsai Je.

15 Fin Asmaan Akninu' na'uab on naan amsa'
 am nak,

“Neno ia, karu hi mneen Uisneno In kabin,

* 3:11 Siit Pures-Bo'is sin 95:7-11

hi kais amnaak-faut, on re' atoin ein naan,
 re' annaon neu-mneman tar antea toon
 bo' haa anbi baer ruman,
 natuin sin nraban nai' Musa.”☆

¹⁶ Oras ia, au he utaan on nai: atoin ein re' anneen anrair ka'o Musa, rarit ankoit nasaitn ee naan, sekau? Sekau ntein, karu ka hit be'i-na'i sin fa, re' ka'o Musa neikn on napoin sin na'kon pah Masir. ¹⁷ Rarit tuaf ein re' anmoe' Uisneno In neekn ee natoo' tar antea toon bo' haa naan, sekau? Sekau ntein, karu ka hit be'i-na'i sin fa. Sin nmonin nbin baer ruman nok sanat-penu, tar antea sin nmaten, rarit ansub sin anbin bare naan. ¹⁸ Rarit tuaf-tuaf ein re' napenin kasat na'ko Uisneno tar antea ka bole fa he ntaman neun bare re' napaar ee neu sin, he nasnasan nok Ne ji, sekau? Sekau ntein, karu ka hit be'i-na'i sin fa. Fin sin re' naan ka nromin fa he nneen ma natniin Uisneno.☆ ¹⁹ Onaim rais ji nakniun een, ai'? Hit be'i-na'i sin ka ntaam nanan fa neun bare re' naan, he nasnasan nok Uisneno, natuin sin ka npirsain fa neun Uisneno.

4

Karu hit tpirsai Yesus Kristus, hit bisa tmarama' tok Uisneno, nahuum on re' hit tasnaas tok Ne

¹ Hit ro he tatenab tarek-reko' oras ia, natuin Uisneno anba'an am nak, Iin na bisa nasnasan nabuan nok Ne. Onaim kas-kais na'ko ki, anmui' tuaf re' ansiu' napoitan saa' re' Uisneno anba'an anrair je naan. ² Fin hit tneen atrair rais reko naan, nahuum on re' hit be'i-na'i sin imsa'

☆ **3:15** Siit Pures-Bo'is sin 95:7-8 ☆ **3:18** Surat Sensus 14:1-35

anneen anrair je. Mes natuin sin ka npirsain fa rasi naan, sin ka napenin fa rasi mnisat saa'-saa'.

³ Mes karu hit tpirsai, hit bisa tasnaas tabu-bua tok Uisneno. Fin unu' te, In nba'an anrair on naan nok hit be'i-na'i sin, mes rarit In natoo' ma natoon neu sin im nak,

“Au ka 'aran ma 'tahan fa he 'kius hi maufinun on naan antein.

Es naan ate Au 'kaas ki m'ak,

‘Hi ka bole fa he mtaam,

he misnaas mibu-bua mok Kau.”

Te kaah, hit tahiin tak, oras Uisneno anmoe' neno tunan ma pah-pinan, In n'ator nain he Iin na bisa nasnasan, he nmoin nabu-buan nok Ne.*

⁴ Anbi reta' anmatoom nok Uisneno anmoe' neno tunan ma pah-pinan, matu'i anmatoom nok re' rasi Uisneno nasnaas nak,

“Uisneno anmepu nrair sin ok-oke',

onaim noka' on naan ate, nateef nok neno no hiutn ii,

In nasnaas.”*⁵

⁵ Ma anbi pisa' bian antein, Uisneno na'uab neu hit be'i-na'i sin im nak,

“Hi ka bole mtaam amtein fa,

he misnaas mibu-bua mok Kau.”*⁶

⁶ Onaim Uisneno nroim he Iin na nasnaas nabu-buan nok Ne. Mes hit be'i-na'i sin re' anneen beno ma rais reko naan nahuun, sin ka bisa ntaman fa, natuin sin ka nmoe' natuin fa Uisneno In romin. ⁷ Mes a'roo-'roo te, Uisneno anpiir naan oras a'teta', he Iin na bisa ntaman ma nasnasan nabu-buan nok Ne. Fin In npaek nai' Daut in uaban am nak,

* **4:3** Siit Pures-Bo'is sin 95:11 * **4:4** Reta' Ahun-hunut 2:2

* **4:5** Siit Pures-Bo'is sin 95:11

“Neno ia, karu hi mneen Uisneno In kabin,
 kais ammoe' hi neekm ein manu' on re' fatu,
 mes amneen ma mitniin rek-reko nai.”✧

⁸ Oras ka'o Daut na'uab am nak, “neno ia”, in ka nteek fa neno re' oras nai' Yosua nok be'i-na'i sin aanh ein ntaman neun pah Kana'an. Fin oras ka'o Daut na'uab on naan ate, sin ar-arsin naan anmate nrarin a'roo goen.✧ ⁹ Nok ranan naan, hit tahiin tak, Uisneno an'ator oras a'teta', he Iin na bisa nasnasan ma nmoin nabu-buan nok Ne. ¹⁰ Ma tuaf re' antaam ma nasnaas nabu-bua nok Uisneno, in nasnaas anrair na'ko in mepu nahuum on re' Uisneno nasnaas amsa' na'ko In mepu nateef neno no hiutn ii, oras In nmo'e nrair pah-pinan ia.✧ ¹¹ Onaim ampaasn om he hi bisa mtaam ma misnaas ma mmoin mibu-bua mok Uisneno. Kas-kais ka nmui' fa es, re' ka ntaam naan fa, natuin in ka nroim fa he nneen Uisneno In Kabin ma Prenat, on re' hit be'i-na'i sin re' naan.

¹² Fin Uisneno In Kabin ma Prenat sin nakrira' ma naruru' raan a'honis re' ammonot ma amneot. Sin anmu'in kuasa he ntaman neun hit nekak, ma antai hit tenab sin ma hit roimk ein ok-oke'. Fin Kabin ma Prenat sin naan na'aik anneis na'ko suni' re' antaam neu hit sisik ma an'oet sisik, kea, ma nuif, he na'pahan sin ok-oke'. ¹³ Anbi neon goe tnanan ma pah-pinan ok-oke' ka tiit fa saa' es, re' ma'koro' ma ma'nifa' na'ko Uisneno, fin In bisa niit nain are' kanan saa'-saa' ii oke'. Ma hit of ro he tbaseun Goe, he tatoon saa'-saa' re' hit atmo'e trair sin.

✧ **4:7** Siit Pures-Bo'is sin 95:7-8 ✧ **4:8** Surat re' Nareta' Nafani' Raan A'honis 31:7, Nai' Yosua 22:4 ✧ **4:10** Reta' Ahun-hunut 2:2

Nai' Yesus anjari 'nakaf rais pirsait re' a'raat re'uf re' ma'tani' nneis na'ko a'naak pirsait amnaa' ein

¹⁴ Hit ro he tnaa' tahe-heran hit pirsait, natuin Uisneno In Anah, Nai' Yesus, anjari 'nakaf rais pirsait re' a'raat re'uf neu kit. Fin In ntoko nrair et Uisneno In human ma In matan, et sonaf neno tunan, he npeis kit. ¹⁵ In bisa npeis kit rek-reko, natuin In nahiin nak, hit re' ia, mansian. Karu anmui' akopo' he tmoe' sanat ate, hit tmouf rabah. Nai' Yesus napein rais kopo' amsa' on re' hit, mes In ka nmouf fa. ¹⁶ Nok rasi naan, iim he hit tabrain he tpaumak-maak Uisneno atbi In a'toko prenat. Natuin In re' naan, neek reko. Onaim karu hit t'onen teu Ne te, ro tebes, In nroim he nakrira' ma naruru' In rais kasian he nturun kit nateef in oras.

5

¹ Tuaf re' sin nait je njair a'naak rais pirsait re' na'ratan nneis, in 'meupn ii ro he nturun tuaf he n'urus sin rais kua'-nonot nok Uisneno. In ro he ntoup sin fua'-turu' ma sin mu'it he na'turu' sin, he nnona' ma nfee sin neun Uisneno. In ro he nfee mu'it anjair fua'-turu' msa' he Uisneno nnoes ma nsaok nain tuaf ein sin sanat ma penu sin. ² Karu nmui' tuaf re' ka nahiin fa raan a'honis amneot am ammonot batuur, ai' tuaf re' anteib ma nbeo na'ko ranan naan ate, a'naak rais pirsait naan ka nasusab sin fa. In neekn ee reko neu sin, natuin in imsa' mansian re' rabah ate bisa nmouf on re' sin. ³ Natuin in imsa' mansian re' anmouf on re' sin, etun a'naak rais pirsait imsa' ro he nfee mu'it njair fua'-turu', he Uisneno

annoes ma ansaok nain in sanat ma penu sin imsa' ✧ ⁴ Atoni' ka bole nait na'ratan fa in tuan he njari 'nakaf rais pirsait re' a'raat re'uf. Suma Uisneno kuun es re' anmui' hak he npiir ma nbetis tuaf on re' naan, nahuum on re' un-unu', oras In nait nai' Musa in tataf nai' Harun. ✧

⁵ On naan amsa' Kristus. In ka nait fa In tuan he njari 'nakaf a'ratas anneis-neisi. Natuin unu' te, Uisneno neikn On es re' nait Je nak,

“Ho re' ia, Au Anah,

Oras ia, Au usaeb 'piru'-baru he Ho mnaa' aprenat.” ✧

⁶ Anbi pisa' bian na'ko Suur Akninu', Uisneno na'uab am nak,

“Ho mjair a'naak rais pirsait re' on re' nai' Melkisedek unu' naan,

mes Ho mu'naak rais pirsait naan tar antea nabar-baar.” ✧

⁷ Oras Nai' Yesus In a'monin anbi pah-pinan ia he noi namsoup, In n'onen ka nasnaas niit fa. Ma In nkae npin-pinus, antoit turun-babat na'ko Uisneno, he nfee Ne 'be'if ma 'ha'tain nekaf. Fin In nahiin nak, Uisneno In kuasan naan, bisa ansoi naan Ee. Onaim Uisneno anneen Nai' Yesus, natuin In natuin batuur-batuur Uisneno In romin. ✧ ⁸ Fin Nai' Yesus naan, Uisneno In Anah. Maski on naan amsa', In ro he napein ha'mu'it ma ma'ne'at, he In nanoni' natuin Uisneno In romin. ⁹ Rarit In ro batuur-batuur natuin Uisneno In roimn ein ok-oke'. Etun oras

✧ **5:3** A'naak Rais Pirsait ein sin Atoran 9:7 ✧ **5:4** Anpoin na'kon Pah Masir 28:1 ✧ **5:5** Siit Pures-Bo'is sin 2:7 ✧ **5:6** Siit Pures-Bo'is sin 110:4 ✧ **5:7** Nai' Mateos 26:36-46, Nai' Markus 14:32-42, Nai' Lukas 22:39-46

ia In njair Roet A'honis neu tuaf-tuaf re' anpirsai Je, he sin bisa nmonin piut-piut nok Uisneno. ¹⁰ Fin Uisneno nait Nai' Yesus anjari 'nakaf neu rais pirsait, re' huma' mese' nok a'naak rais pirsait nai' Melkisedek un-unu' naan.

Kais amporin hi rais pirsait meu Kristus

¹¹ Anmu'i ntein rasi mfaun re' au he utoon sin anmatoom nok Kristus ma nai' Melkisedek naan, mes au ka uhiin fa he u'uab on mee, hena' hi mihiin rasin naan, natuin hi on re' ri'ana' fe' re' anmoon, re' ka bisa nahiin fa saa'-saa' fa fe' nok batuur. ¹² Te kaah, hi arki ampairsai 'roo goen. Batuurn ii, hi ro he mjair tungguru, he bisa minoni' tuaf bian amtein. Onaim mes hi on re' ri'ana kru'uf fe' re' ka naah nahiin fa fe', re' fe'e nsus-suus fe'. Hi mperluu tuaf he nanoni' ki rasi re' na'uu ma na'baa' na'ko Uisneno In Suur Akninu' fe'. ¹³ Au utaib ki 'ok ri'ana kru'uf on re' naan, natuin hi ka mihiin fa fe' noni' uuf anmatoom nok Kristus he hi bisa mmoin nok amneot ma amnonot. ☆ ¹⁴ Mes karu ri'ana kru'uf na'nae neem ate, in ka niun fa susu ntein, mes in naah amnahat re' manu'. Naan huma' mese' on re' tuaf re' nanoni' nrair ma nahiik batuur-batuur Uisneno In nonin, maut he in nahiin mee es re' reko, ma mee es re' amre'ut ma maufinu.

6

¹ Onaim hi ro he minoni' mtein noni' re' ankoon ma namtiis, natuin hi minoni' nrair sero 'roo goen noin uuf anmatoom nok Kristus. Es naan ate oras ia, ka tperluu fa he minoni' mifanfain noni' uuf anmatoom nok rasi atoni' ro he nasaitan sin saant am penu sin; noni' anmatoom

☆ 5:13 1 Korintus 3:2

nok atoni' anpirsai Uisneno; ² noni' anmatoom nok srani', noni' anmatoom nok ttao 'nimaf he ttoup Asmaan Akninu'; noni' anmatoom nok Uisneno of namonib nafani' amates; ma noni' anmatoom nok tuaf-tuaf ro he nbaiseun Uisneno, he ntoup In atfeka' nak, sekau es re' bole nmoin piut nok Ne, ma sekau es re' kahaf. ³ Mes karu Uisneno nfee mainuan ate, iim he hit tatnani ttein, fin au he unoni' ki rasi re' nkoon ma namtiis intein.

⁴⁻⁶ Te kaah, anmui' tuaf re' nahiin Kristus In nonin, ma nnaben anrair Uisneno In nekan arekot, tar antea In nsonu' In Asmaan Akninu' neu sin. Sin nahini nrair Uisneno In Kabin ma Prenat sin, ma sin nnaben anrair In kuasan re' In of he npaek je oras pah-pinan ia namsoup. Maski on naan amsa', mes sin nait inporin sin rais pirsait naan, ma nkoit nasaitan Kristus. Es naan ate, ka neu fa he nmui' ranan he sin bisa ntebi nfanin ma antotin rais saok sanat, rarit nmarame' nok Uisneno ntein. Fin karu atoni' ka nroim fa he na'piis on naan ate, naan huma' mese' on re' sin nkuus na'maet nafani' Uisneno In Anah et hau nehe, rarit sin nfare' anbi too mfaun ein sin humak ma sin matak.

⁷ Tuaf human on re' naan, nahuum on re' etu ma rene re' karu tseen pena' ai' maka' te ka bisa tseik ma ttoun goe fa, fin ka tiit fa maka' ma pena' sin puink ein. Te kaah, karu uurn ii nsaun neem, auf reok gui bisa neik sekit ma mnonut neu atoin tani. Rarit Uisneno nasanut tetus-athoen, he etu ma rene sin bisa neik sekit ma mnonut ko'u. ⁸ Mes tuaf re' ankoit nasaitan Kristus, nahuum on re' etu ma rene re' nmui' haa 'aik kisan. Ma 'aika' naan ka neik fa in upan

ma osan saa'-saa'. Ka 'roo fa te, Uisneno neem ma nfee hukun neu etu ma rene naan. Rarit In nout nakrati' sekit ma mnonut re' ka ma'upan ma ma'osa' fa saa'-saa' re' naan.✧

⁹ Aok-bian manekat arki! Maski au u'uab 'aan 'eik haan ma'tani' kre'o on naan, mes au uhiin amsa' 'ak, hi ka mkoit misaitan fa Kristus. Fin hi mpirsai mrair Je, ma hi 'moinm ein on re' etu ma rene te, neikin sekit ma mnonut arekot.

¹⁰ Onaim mimnau Uisneno In neekn ee mne'o ma namnoon, ma In ka nnikan fa hi maskeet ein. Fin hi mmeup ma'tani' he mturun lin na, ma amneek sin. Na'ko unu', hi minaob amrair In mepu. Ma hi ammo'e msa' on naan fe'. ¹¹ Mes oras ia, au 'roim he hi arki mmeup ma'tani ntein, he mituin piut-piut on re' naan tar antea namsoup. Nok ranan naan, hi of amtoup are' kanan rais reko re' hi mifnekan ma mharap sin na'kon Uisneno. ¹² Asar kais mipeeh. Hi ro he mait i'tope' mi'ko tuaf-tuaf re' anpirsai nrarin neun Uisneno nahunun ki. Fin sin nafnekan ma nhaarp ein piut-piut neu Ne, tar sin ntoup saa' re' In nba'an anrair je.

¹³⁻¹⁶ On re' hit ka'o Abraham. Un-unu' te, Uisneno nahake' rais manba'an nok ne npaek supat. Karu mansian ii nahake' supat, biasa npaek Uisneno In kanan, he Uisneno njair saksii, natuin Uisneno naan, anneis na'ko ne. Ma karu anmui' rasi, tuaf-tuaf arsin nahinin nak, tuaf a'uab naan, batuur, natuin in nsupan nrair npaek Uisneno In kanan. Naan, mansian ii in 'mo'et ma taos es re' naan. Mes oras Uisneno nahake' supat nok ka'o Abraham, In npaek kuun

✧ 6:8 Reta' Ahun-hunut 3:17-18

In kanan, natuin ka tiit fa es, re' na'raat anneis
na'ko In tuan. In nahake' rais manba'an am nak,
“Au of a'fee tetus-athoen anho-hoen,
neu ho sufa'-ka'uf sin.

Sin of nasufan, nafuan, ma namsa'in,
tar antea ka tiit fa tuaf re' bisa ansoi' naan
sin.”[☆]

Uisneno nba'an anrair on naan ate, ka'o Abraham anpirsai piut, rarit nafnekan ma nharap piut neu Uisneno, maski 'roo re'uf, na' in ntoup Uisneno In supat naan in afan. ¹⁷ Nok ranan naan, hit tahiin, karu Uisneno nahake' rais manba'an nok Iin na, In nfuut rais manba'an naan nok supat, he njamin nak, saa' re' In nbaa'n ee naan, ro batuur ma ka na'bani' fa. ¹⁸ Anmui' naan rasi nono' nua re' ka bisa na'bani' fa. Es, es re' Uisneno In rais manba'an. Ma es antein, es re' In supat re' In npake, he njamin In rais manba'an. Onaim karu Uisneno njamin rasi piis es, ro batuur In nmoe' natuin ee. In ka neu he napoi fa. Es naan ate, hit kais neek ii nabait nok In rais manba'an. Hit taen atrair teu Ne he tapein saok sanat ma 'honis, onaim oras ia, hit tpao ma tafnekan ma tharap piut teu Ne nmees. ¹⁹ Nok ranan naan, hit neek ii ntainina' ma ka na'oni' fa, on re' kofa' re' ntea tais je ninin ma nhake mnasanut bonit. Fin hit tafnekan ma tharap teu Yesus Kristus, re' anjari 'nakaf rais pirsait re' a'raat re'uf neu kit. Unu' te, nateef nok atoin Yahudis sin neon ko'u, 'nakaf rais pirsait re' a'raat re'uf antaam anpeo' tai mnanu' re' npiir' ee he nbatis Ke'en Akninu' nneis-neisi, nok

[☆] **6:13-16** Reta' Ahun-hunut 22:16-17

kee' too mfaun, he nbaiseun Uisneno nbi naan. ☆
 20 Mes oras ia, Nai' Yesus antaam nahuun, he
 nfei ranan neu kit. Fin In 'nakaf rais pirsait
 re' a'raat re'uf amsa', re' huma' mese' on re'
 nai' Melkisedek afi unu' naan. Mes Nai' Yesus
 ma'tani' nneis na'ko a'naak rais pirsait amnaa'
 ein, natuin In ka nasnaas niit fa he nanaob In
 mepu. ☆

7

*Nai' Melkisedek naan, a'naak rais pirsait es,
 re' na'raat anneis na'ko a'naak rais pirsait nai'
 Lewi ma in sufan-ka'un sin*

1-3 Un-unu' te, nai' Melkisedek anjair usif kota
 Salem. In a'naak rais pirsait neu tuaf-tuaf re'
 na'ruri' ma na'besan Uisneno A'raat Re'uf amsa'.
 In kanan naan, in oetn ii nak, “usif re' neek
 amneot ma ammonot”. Ma usif Salem in oetn
 ii, “usif neu rais rame' ma mamut”. Ka tiit fa
 tuaf nahiin nai' Melkisedek in amneemn ii, na'ko
 mee. Ka tiit fa tuaf nahiin in mahoint ein, in
 beif-na'if sin ma uu'k ein. Ka tiit fa tuaf nahiin
 in neon mahonin, ma in neno 'maten. Atoni'
 suma nahiin nak, in re' naan, usif kota Salem,
 ma a'naak rais pirsait neu Uisneno. Mes in on
 re' Uisneno In Aanh amsa', natuin in a'naak rais
 pirsait re' nanaob in meup goe piut-piut amsa'.

Neot es, anmui' usif fauk neman nok sin so-
 rauris ein, ma nasiik naan kuuk bare' na'ko ka'o
 Abraham in partei ngguin. Rarit ka'o Abraham
 annao nmakeen nabu-buan nok in partei ngguin,
 tar antea sin niis nain uisf ein naan. Onaim ka'o

☆ 6:19 A'naak Rais Pirsait ein sin Atoran 16:2

☆ 6:20 Siit

Pures-Bo'is sin 110:4

Abraham neik nafani' baer' ein naan ok-oke'. Oras ka'o Abraham annao nfain on naan ate, nai' Melkisedek npoi na'ko kota Salem ma nseun ka'o Abraham. Rarit in na'uab anfee tetus-athoen neu ka'o Abraham am nak, "Maut he Uisneno A'raat Re'uf naan, In kuun es anfee ko tetus-athoen." Rarit ka'o Abraham anbati nfeen nai' Melkisedek sapaaf es na'ko sapaaf bo'es na'ko are' kanan baer siikn ein re' sin nasiik nafani' sin naan. In nfee on re' naan, natuin nai' Melkisedek naan, a'naak rais pirsait na'ko Uisneno A'raat Re'uf.✧

⁴ Onaim mitenab mirek-reko' rasi anmatoom nok nai' Melkisedek re' ia! Ka'o Abraham anfee ne bait bo', na'ko are' kanan baer arekot anneisneisi, re' in nait neik sin anfain naan. Onaim batuur een, nai' Melkisedek naan, kaes ko'u ma a'naet. ⁵ Te kaah, oras naan, Uisneno ka nait ma nasaeb fa tuaf he njair a'naak rais pirsait. Tar antea ka'o Abraham in uup-ka'of nai' Lewi fe'e te, na' Uisneno nait je ma in sufan-kau'n ein anjarin a'naak rais pirsait neu ka'o Abraham in sufan-ka'un sin. Rarit Uisneno nasanut atoran nak, atoni' na'ko uuf nai' Lewi anmui' hak he ntoup bait bo' na'ko sin aok-bian Isra'el sin.✧

⁶ Mes nai' Melkisedek naan, ka nai' Lewi in suuf na fa. Maski on naan amsa', mes ka'o Abraham anbati nfeen ee bait bo', natuin nai' Melkisedek naan, atoni' re' mapina'-makraha' ma a'naet. Oras naan, ka'o Abraham antoupu nrair rais manba'an na'ko Uisneno he nfee ne tetus-athoen. Mes maski on naan amsa' nai' Melkisedek na'uab am nak, "Maut he Uisneno A'raat Re'uf anfee ko tetus-athoen." ⁷ Ia njair

✧ 7:1-3 Reta' Ahun-hunut 14:17-20 ✧ 7:5 Surat Sensus 18:21

bukti nak, nai' Melkisedek naan, kaes ko'u ma a'naet. Natuin tuaf re' na'uab anfee tetus-athoen, ro batuur ko'u nneis na'ko tuaf re' atoup tetus-athoen naan.

⁸ A'naak rais pirsait ein, sin ar-arsin anmu'in hak he ntoup bait bo'. Mes neu sin suma mansian biasa, 'roo-'roo te, sin nmaten. A'naak rais pirsait nai' Melkisedek antoup bait bo'. Mes in nmoin piut, natuin Suur Akninu' ka ntui natoon fa nak, in nmaet. ⁹⁻¹⁰ Natuin ka'o Abraham anbati nfeen nai' Melkisedek bait bo' na'ko baer' ein naan, atoni' bisa natenab ansoba' nak, in nasaah amsa' in sufan-kau'n ein re' ka nahonis sin fa fe'. Nok ranan naan, hit bisa tak, in nbaen anrair in uup-ka'of nai' Lewi in bait bo'.*

Hit tperluu a'naak rais pirsait huum fe'u, natuin a'naak rais pirsait amnaa' ka bisa nsaok nain fa sanat

¹¹ Oras nai' Lewi in sufan-kau'n ein anjarin a'naak rais pirsait, Uisneno anpiir naan ka'o Musa in tataf nai' Harun he njair a'naak rais pirsait sin a'naak ko'u. In es re' ahun-hunut. A'naak rais pirsait ein sin meupk ein esan re' nakrira' ma naruru' ranan he atoni' bisa nmoni kninu' ma reko nok Uisneno. Maski sin nmoe' natuin atoorn ein naan ok-oke' msa', mes sin a'naak pirsait on re' nai' Harun ka nabei' fa nakninu' nain sin. Es naan ate sin nperluu a'naak rais pirsait a'teta' re' huma' mese' on re' nai' Melkisedek. ¹² Mes karu a'naak rais pirsait

* **7:9-10** Atoin Yahudis sin nak, atoni' in sufan-kau'n ein uu'k ein anmui' nain et sin be'i-na'i sin aok ein.

huum fe'u ansenu' a'naak rais pirsait amnaa' ate, atoran amnaa' amsa' ro he senu'.

¹³ Hit tahiin tak, a'naak rais pirsait huum fe'u naan, es re' Nai' Yesus. In na'ko uuf a'teta', ka na'ko fa uuf nai' Lewi. Karu tatuin ka'o Musa in atoran, a'naak rais pirsait on re' nai' Harun, suma na'uu na'ko uuf nai' Lewi nmees, ka na'uu fa na'ko uuf a'teta'. ¹⁴ Mes hit tahiin tak, hit Usi' Yesus Kristus re' naan na'uu na'ko uuf nai' Yahuda. Tatuin ka'o Musa in atoran, ka tiit fa a'naak rais pirsait na'uu na'ko uuf re' naan.

¹⁵ Mes Uisneno ka npaek fa atoran amnaa' naan, natuin oras ia, Nai' Yesus es re' anjair a'naak rais pirsait huum fe'u on re' nai' Melkisedek. ¹⁶ Fin tatuin ka'o Musa in atoran, a'naak rais pirsait amnaa' ein ro he na'uun na'kon uuf nai' Lewi. Mes Nai' Yesus ka na'uu fa na'ko uuf re' naan. Maski on naan amsa', mes Uisneno nait Je njair a'naak rais pirsait huum fe'u, natuin In nmui' kuasa he nmoin piut-piut, ma ka tiit fa es, re' he bisa nareu' Goe. ¹⁷ Fin Uisneno In Surat matu'i mnak,

“Ho mjair a'naak rais pirsait huma' mese' on re' nai' Melkisedek afi unu' naan,
mes Ho mjair a'naak rais pirsait tar antea nabar-baar.”☆

¹⁸ In oetn ii nak, atoran amnaa' ka nmui' fa kuasa he nturun mansian ein. Es naan ate, Uisneno nait napasib atoran amnaa', re' unu' fe'e te, In nfee je neu ka'o Musa naan. ¹⁹ Maski atoni' nmoin ma nmoe' natuin atoran amnaa' ein, mes sin nmui' in sanat ma penu fe'. Es naan ate, oras

☆ **7:17** Siit Pures-Bo'is sin 110:4

ia, Uisneno anfei ma naruru' raan reko nneis, maut he hit bisa tmoni tbi rais rame' tok Ne.

Nai' Yesus naan, a'naak rais pirsait re' ma'tani' nneis na'ko a'naak rais pirsait amnaa' ein

²⁰⁻²¹ Afi unu', oras Uisneno nasaeb nai' Lewi in sufan-kau'n ein anjarin a'naak rais pirsait, In ka nba'an fa, ma ka nahake' fa supat saa'-saa' nok sin. Mes oras Uisneno nasaeb Nai' Yesus anjair a'naak rais pirsait, In nba'an am nak, "Au re' ia, Usi'!

Au 'suup, ro tebes Au ka ubani' ma 'senu' fa saa' re' Au 'ba'an a'rari.

Au usaeb Ko mjair a'naak rais pirsait, he Ho munaob Ho mepu piut-piut."✧

²² Nok ranan In nba'an on naan, Uisneno anpaek Nai' Yesus he njamin neu kit nak, In anroim he nmafutub rais manba'an re' reko nneisi ntein nok kit.

²³ Afi unu', a'naak rais pirsait huum amnaa' ro he masenu'-maseka' piut-piut, natuin sin nmaten. Etun anmui' a'naak rais pirsait amfa-faun. ²⁴ Mes Nai' Yesus naan, a'naak rais pirsait huum fe'u re' anmoin nabar-baar ma nanaob In mepu piut-piut. Es naan ate, ka nperluu fa he nmui' asenu' neu Nai' Yesus. ²⁵ Nok rasi naan, Nai' Yesus bisa nsoi nafetin naan mansian ii ok-oke', re' anroim he neem anbin Uisneno. Tuaf ein re' naan antaman natuin Nai' Yesus In ranan. In bisa nmoe' on re' naan tar antea nabar-baar. Ma In njair Tuaf Apesit neu sin anbi Uisneno In matan re' bisa nbaiseun Uisneno piut-piut he nturun ma nbaab sin.

✧ **7:20-21** Siit Pures-Bo'is sin 110:4

26 Nai' Yesus naan, a'naak rais pirsait a'raat re'uf, re' hit tperлуу. NatuIn In re' naan Atoni kninu' re' ka nmui' fa sanat saa'-saa'. In re' naan, ka huma' mese' fa nok mansian biasa re' suma nahini haa 'moe' sanat. Fin Uisneno nasaeb na'rat-ratan Nai' Yesus, anneis na'ko are' kanan saa'-saa' ii anbi pah-pinan ma sonaf neno tunan. 27 Es naan ate, Nai' Yesus reko nneis na'ko are' kanan a'naak rais pirsait huma mnaa' sin naan. Afi unu', sin ro he nroron mu'it neno-neno he njarin fua'-turu', he Uisneno nsaok nain sin saant ein kuuk. Rarit na' sin nmo'en fua'-turu' neu biak ein. Mes Nai' Yesus ka nperлуу fa he nmoe' fani-fani on re' naan, natuIn In nnona' nrair In tuan a'kuun no mese' he njair fua'-turu'. Nana namtiis inrair he Uisneno nsaok nain sanat ma penu mansian sin ok-oke'.[☆]

28 TatuIn ka'o Musa in atoran, sin nasaeb mansian biasa he njair a'naak rais pirsait. Mes sin nmu'in sanat fe'. Es naan ate, Uisneno anmoe' rais manba'an fe'u nak, In he nait nasaeb In Anah he njair a'naak rais pirsait a'raat re'uf. Fin In Anah ia, natuIn In roimn ee piut-piut.

8

Uisneno npaek Kristus he nahake' rais manba'an fe'u, re' ma'tani' nneis na'ko rais manba'an amnaa'

¹ Onaim au u'uab rais ma'tani' es on nai: oras ia, hit tmu'i trair a'naak rais pirsait re' na'raat ma ma'tani' nneis na'ko ahuunt ein. In re' naan, es re' Nai' Yesus. In ntuun On ma naprenat

[☆] 7:27 A'naak Rais Pirsait ein sin Atoran 9:7

et sonaf neno tunan anbi bare re' mahormaat re'uf et Uisneno A'raat Re'uf In abnapan a'ne'u.✠

² In nanaob In mepu et Uisneno In baer onen batuur. Bare naan, Uisneno neikn On es re' ammo'e, mansian ii ka bisa nmoe' je fa.

³ A'naak rais pirsait sin a'naak ko'u, biasa neik fua'-turu' he nafuat sin neu Uisneno. Es naan ate, Nai' Yesus ro he neik fua'-turu' msa'. ⁴ Mes Nai' Yesus ka nanaob fa In mepu nbi pah-pinan, natuin anbi pah-pinan ia anmui' a'naak rais pirsait re' anfee fua'-turu' neu Uisneno, natuin ka'o Musa in atoran. ⁵ Sin nanaob sin mepu nbi Tenar Onen, on re' baer onen batuur et sonaf neno tunan. Fin oras ka'o Musa nroim he nahake' Tenar naan, Uisneno namnaub ee mnak, "Mumnau murek-reko"! Ho ro he nmoe' Tenar naan batuur-batuur mutuin gambar re' Au ukrira' 'rair je 'eu ko, anbi 'toe'f ee tunan!"✠

⁶ Mes Nai' Yesus In mepu, ma'tani' nnes-neis na'ko a'naak rais pirsait amnaa' ein. Oras ia, Uisneno nahake' rais manba'an re' reko nneis, natuin In npaek Nai' Yesus anjair nete-ranan he mansian ii bisa nmonin nbin rais rame' nok Uisneno.

⁷ Un-unu' fe', In nahake' rais manba'an nok ka'o Musa oras In nasanut atoorn ein naan. Maski on naan amsa', mansian ii ka bisa nmoni kninu' fa natuin atoran naan. Nok ranan naan, sin ka bisa nmonin reko fa nok Uisneno. Es naan ate oras ia, perluu he nmui' rais manba'an re' reko nneisi ntein. ⁸ Fin unu' fe'e te, Uisneno nakain Iin na, natuin sin ntanhai nafan-fain In

✠ **8:1** Siit Pures-Bo'is sin 110:1 ✠ **8:5** Anpoin na'kon Pah Masir 25:40

atoran amnaa'. Oras In ka naran ma ntahan fa ntein ate, In natoo', rarit na'uab am nak,

“Amneen mirek-reko', Au re' ia Usi'!

Ro tebes! Au ro he uhake' rais manba'an fe'u,

'ok pah Isra'el,

'ok uuf nai' Yahuda.

⁹ Rais manba'an re' Au he uhaek ee 'ok sin naan, ka huma' mese' fa nok rais manba'an re' unu' fe'e te Au uhaek ee,

'ok sin be'i-na'i sin.

Unu' fe', Au 'naa' sin a'niimk ein,

he upoitan sin na'kon pah Masir.

Mes sin ka nmoe' natuin ein fa

saa'-saa' re' sin manbaa'n ein nok Kau naan.

Es naan ate, Au ka 'roim he 'toe 'ok sin fa 'tein.

¹⁰ Rais manba'an re' au he uhaek ee 'ok pah Isra'el,

in afan naan ii, on nai:

Au of utunu' ma 'tao Au atoran naan a'bi sin teenb ein naank ein.

Au of a'tui Au preent ein a'bi sin nekak naank ein.

Rarit Au 'jair sin Uisneno,

ma sin njarin Au ngguin.

¹¹ Sin of ka nperluu fa he nanoni' ntein sin partei ngguin,

ma sin aok-bian sin im nak,

'Hi ro he mihiin ma mikeo Uisneno!'

fin sin arsin nahiin ma nakeo Kau nok reko, anmurai na'ko aan-aan muni' tar antea ko'u ma unu.

¹² Natuin Au 'roim he ukirira' Au rais kasian 'eu sin,

es naan ate, Au 'nikan ma 'niahan 'ain sin saant ein ok-oke'."✧

13 Oras Uisneno na'uab nak, In he nahake' rais manba'an fe'u nok sin, in oetn ii nak, rais manba'an amnaa' naan, ka mapake' fa goen. Ka 'roo fa te, in namneuk goen.

9

Usif Yesus anjair fua'-turu' re' reko nneis na'ko fua'-turu' amnaa' ein

1 Oras ia, au he umnaub ki on nai: oras Uisneno nahake' rais manba'an ahunut naan nok hit be'i-na'i sin, In nfee atoran amsa' he sin nafeen ein baer onen, he sin bisa n'oen ein ma na'besan neu Ne, natuin atoran naan in romin.

2 Anbi baer onen naan, anmui' kintal ma tenar kou' goes. Anbi tenar naan in ke'en a'si'u, anmui' baer paku, ma mei jes re' a'naak rais pirsait ein anpaek je he ntaon uu-tunu' re' he nafuat ee neu Uisneno. Ke'en a'si'u naan, sin nteek ee te nak, *Uisneno In Ke'en Akninu'*.✧

3 Anmui' tai-eon kou' goes anpira' nakfir' ee he nbatis ke'en bian re' sin nteek ee nak, *Uisneno In Ke'en Akninu' nneis-neisi*.✧ 4 Anbi tai-eno' naan in matan, anmui' naan mei noni es, anpaek je he noutun kemenyaan foo meni' neu Uisneno. Ma anbi Ke'en Akninu' nneis-neis re' naan, anmui' peit noni es, re' sin nteek ee nak, *Peit Rais Manba'an*. Anbi peti naan in nanan, sin natunu' baer unu' he namnaub mansian anmatoom nok Uisneno In rais manba'an re' in nahake' ma nfutu' nrair je nok sin. Anbi peti

✧ 8:12 Nai' Yereimias 31:31-34 ✧ 9:2 Anpoin na'kon Pah Masir 26:1-30, 25:23-40 ✧ 9:3 Anpoin na'kon Pah Masir 26:31-33

naan in nanan amsa' anmui' naan ook beit noni es, re' matua' nok utunu' re' anteek ee nak, *manna*. Utunu' naan es re' unu' fe'e te, Uisneno nasaunt ee na'ko neon goe tnanan neu sin hit be'i-na'i sin oras sin namnahan nmaten anbin baer ruman. Anbi peti in nanan amsa' sin ntao ka'o Harun in teas ametos re' unu' fe'e te natoor. Ma anmui' faut bena' re' Uisneno anpaek je he nruun In atoran re' In nfee je neu ka'o Musa neno naan. ✧ ⁵ Anbi peti naan in toben, anmui' naan faut maruna' fua' nua. Faut maruun ein naan nahuum on re' Uisneno In ameput re' manini' na'ko sonaf neno tunan, re' anhaken ma nfei sin niink ein mainuan he ntoeb naan peti naan, natuin bare' naan nakrira' Uisneno In rais kasian neu mansian. Mes oras ia, au ka 'mui' fa oras mainuan he u'uab ma 'tui sin tar namnuut anmatoom nok baer' ein naan.*

⁶ Sin nkikin ma nsusun bare' anbi Uisneno In Tenar Onen naan, namneo on re' naan. Rarit a'naak rais pirsait sin anpoi-ntaman neno-neno anbi ke'en naan in a'siun he nanaob sin mepu anbi naan. ✧ ⁷ Mes suma a'naak rais pirsait Yahudi sin a'naak kou' goe es re' he bole ntaam neu Uisneno In Ke'en Akninu' nneis-neisi. Mes in ka bole ntaam fa rafu'-rafu'. In suma bisa ntaam toon es ate, no goes. Onaim karu in ntaam, in

✧ **9:4** Anpoin na'kon Pah Masir 30:1-6, 25:10-16, 16:33, Surat Sensus 17:8-10, Anpoin na'kon Pah Masir 25:16, Surat re' Nareta' Nafani' Raan A'honis 10:3-5 * **9:5** Tuis uab Yunani nak, Uisneno In ameput manini' na'ko sonaf neno tunan anbi re' ia, kaan ee '*kerubim*'. Uisneno In ameput na'ko sonaf neno tunan biasa, sin nteek ee nak, '*angelos*'. Mes sin ka maniin ein fa. Amkius *Reta' Ahun-hunut* 3:24, ma *Anpoin na'kon Pah Masir* 25:18-22. ✧ **9:6** Surat Sensus 18:2-6

ro he neik naa' na'ko mui' fua'-turu', he nbisin Peti Rais Manba'an naan in toben. Naa' naan in sairt ii nak, maut he Uisneno ansaok nain a'naak rais pirsait nok iin na sin saant ein ok-oke', maski sanat re' sin nmoe' sin naan, sin ka nakeo naan sin fa.☆

⁸ Uisneno anpaek In Asmaan Akninu' he nmoe' kit he tahiin tak, tai-eno' naan an'eka' ranan fe' he ttaam teu Ke'en Akninu' nneis-neis naan, in oetn ii nak, mansian ii ka bisa napein fa mainuan fa fe' he ntaam antea Uisneno In human ma In matan, oras atoran amnaa' naan anpaek je fe'. ⁹ Rasin re' ia ok-oke' anjarin a'tope' re' Uisneno In Asmaan ee anpaek je, he nanoni' kit re' amonit oras ia. Unu' fe', hit be'i-na'i sin neik ein saa'-saa' re' he nnona' ma nfee sin ma sin mui't ein re' he njarin fua'-turu' neun a'naak rais pirsait, he Uisneno ansaok ma nnoes nain sin sanat ma penu sin. Maski sin neikin fua'-turu' mfaun on naan amsa', mes fua'-tuur' ein naan ka bisa nakninu' nain fa sin neek ein, ma ka naneuk nain fa sin tenab sanat anbi sin neek ein. ¹⁰ Onaim saa' re' sin nmoe' je naan, suma natuin atoran rais pirsait ahaa. Anmui' atoran aprenat nak, sin ka bisa neuk fa ia, ma ka bisa niun fa ia. Anmui' atoran bian nak, sin ro he naniu sin tuak ein, ma nsaef sin baer' ein natuin atoorn ii in romin. Te kaah, atoorn ein naan ok-oke', suma an'ator mansian ii in aon a'pohon, ma ka bisa n'ator fa in nekan. Maski on naan amsa', mes atoran naan, sin ro he nmoe' ma nanaob ee piut, tar antea Uisneno ansenu ma nseka' nok atoran fe'u.

☆ **9:7** A'naak Rais Pirsait ein sin Atoran 16:2-34

11 Mes oras ia, anmu'i nrair Tuaf re' Uisneno anba'an anrair Je na'ko unu'. Tuaf re' naan, es re' Kristus. In neem anrair he njair hit a'naak rais pirsait a'ratas anneis-neisi, ma In nmo'e nrair rais reko neu kit.† In nanaob In meup goe, huma' mese' on re' a'naak rais pirsait amnaa' ein, mes In nmepu nbi baer mepu re' ma'tani' nneis. In baer mepu naan, ka et fa pah-pinan, natuin bare naan ka mansian ii fa es re' anmo'e. 12 Kristus antaam amsa' neu Ke'en Akninu' nneis-neis re' naan, he nbaiseun Uisneno on re' a'naak rais pirsait amnaa' ein anmoe' je toon es ate no goes. Oras In ntaam, In neik naa' he nnona' ma nfee je neu Uisneno. Mes naa' re' naan a'teta' kuun. Kristus ka neik fa naa' na'ko mui't ein sin naa' ein. Naa' re' In neik je naan, es re' In naa' akuun, natuin In nmaet he njair fua'-turu' neu kit. Mes Kristus antaam neik In naa' no mees' aah he nafetin kit na'ko sanat tar antea nabar-baar.

13 Onaim Kristus In naa' naan, batuur ma'tani' nneis na'ko naa mu'it. Tatuin ka'o Musa sin atoran, tuaf asanat, sin n'oemetan, ma ka pantas fa he ntaman ma na'besan neun Uisneno. Sin ro he nnaon neun a'naak rais pirsait ee he ntaon fua'-turu', he fua'-turu' naan in naa' ee nakninu' nafani' sin. Anmui' fua'-turu' mfaun re' npaek naa' 'bibi, ai' naa bijae. Anmui' atoran es amsa' nak, karu tuaf anreo' amates in n'oemetan nrair anbi Uisneno In human ma In matan. Karu tuaf naan anroim he nakninu' nfain, a'naak rais

† 9:11 Tuis uab Yunani re' reko nneis ji, sin ntuin am nak, "In nmo'e nrair rais reko neu kit." Mes anmui' surat bian antein antuin am nak, "In nroim he nmoe' rais reko neu kit."

pirsait ro he nait auf nao na'ko bijae tipu' re' fe' notu nrari. Rarit neik auf nao naan he nfui a'oemetas naan, he in nakninu' nfain.✧

¹⁴ Onaim karu naa mui't ii nakninu' nain hit aok a'pohon in 'oemetan, anneis-neis Kristus In naa'. Natuin In naa' naan, nsoi nafetin anrair hit saant ein, ma nakninu' nrair hit nekak nanan. Hit sanat re' naan na'bata' ma nbatis kit na'ko Uisneno. Oras Kristus anmaet on naan ate, Uisneno In Asmanan re' anmoin nabar-baar anturun ma nbaab Ee he In nnona' ma nfee In tuan ee neu Uisneno, nahuum on re' mu'it re' njair fua'-turu' re' ka nmui' fa paap aan'-aan' es amsa'. Onaim oras ia, hit bisa ta'ruri' ma ta'bees rek-reko teu Uisneno Amonit Abar-barat naan.

¹⁵ Kristus In naa' ee es re' ma'tain re'uf, etun Uisneno anpaek Je, he nahake' rais manba'an fe'u nok are' tuaf ein ok-oke' re' Uisneno no'en ma nnapen sin he njarin Iin na. Oras Kristus anmaet he nsoi nafetin sin, In nsaok naan hit be'i-na'i sin saant ein un'-unu' naan, oras Uisneno nahake' rais manba'an amnaa' naan. Nok rasi naan, sin bisa nmonin nabar-baran nok Uisneno.

¹⁶ Au 'pake 'tope' tuaf atoup pusaak, on re' amaf es anmoe' surat warisan he nfee pusaak neu in anah. Mes ri'ana' naan fe' napein mainuan he ntoup pusaak naan, karu in aamf ee nmaet. ¹⁷ Karu amaf naan anmoin fe', ri'ana' naan ka bisa ntoup fa pusaak re' in aamf ee nba'an anrair je anbi surat warisan. ¹⁸ On naan amsa' Uisneno In manba'an ahunut re' In nahaek ee nok hit be'i-na'i sin. Sin fe' napenin

✧ **9:13** A'naak Rais Pirsait ein sin Atoran 16:15-16, Surat Sensus 19:9,17-19

mainuan he bole ntoup saa' re' Uisneno anba'an anrair je naan, karu es anmaet nahuun. Es naan ate, sin fua'-turu' re' anpaken naa mu'it anjair bukti mnak, anmui' saa' es, re' anmate nrair. ¹⁹ Oras naan, ka'o Musa na'bu'a' hit be'i-na'i sin, he in natoon apreent ein ok-oke' re' matu'i et atoran re' Uisneno nasaunt ee neu sin naan. Rarit ka'o Musa anroor bijae ma 'bibi, ma ntoro' naa', rarit ansero' nok oe. In anpaek kuuf me'e msa' he nfuut hau noo taef. Rarit in nateep ee ntaam neu naa' naan, he nbisin neu Uisneno In Tuis, ma neu too mfaun ein ok-oke'.[‡] ²⁰ Oras ka'o Musa anbisin naa' naan, in na'uab am nak, "Naa' re' ia, anjair tanar nak, Uisneno nahake' rais manba'an nok ki. Karu hi mmoe' mituin In apreent ein ok-oke', In of anfee ki are' saa'-saa' re' In nba'an nain sin naan ok-oke'." ²¹ Ka'o Musa anbisin naa' naan neu Tenar Onen amsa', ma neu are' baer' ein re' anbin naan, re' sin npaek sin he na'besan Uisneno. ²² Tatuin Uisneno In atoran, haet are' kanan rais 'oemeetn ein ok-oke', ro he takninu' sin atpaek naa'. Nok ranan naan, karu mansian ii nroim he kninu' na'ko sanat ate, ro he naa' ii nsai.

²³ Saa' re' au ureta' anmatoom nok hit be'i-na'i sin Tenar Onen naan, naan sin njarin a'tope', he hit bisa tahiin Uisneno In baer onen re' batuur et sonaf neno tunan. Karu a'naak rais pirsait amnaa' sin antaman neun Tenar naan in nanan, he na'besan neu Uisneno, sin ro he kninu' ok-

[‡] **9:19** Tuis uab Yunani nak, hau no'on re' ia, sin kaank ein ὕσσωπος (*hyssopos*). [✧] **9:20** Anpoin na'kon Pah Masir 24:6-8
[✧] **9:21** A'naak Rais Pirsait ein sin Atoran 8:15 [✧] **9:22** A'naak Rais Pirsait ein sin Atoran 17:11

oke', npaek naa mu'it re' npaek je njair fua'-
 turu'. Uisneno In baer onen anbi sonaf neno
 tunan ro he kninu' msa'. Mes ro he npaek
 naa' fua'-turu' re' ma'tani' nneis na'ko naa mu'it.
²⁴ Ke'en Akninu' nneis-neis re' Kristus antaam
 naan, ka ke'en et Tenar Onen re' mansian ii
 nmoe' je fa. Fin Tenar anbi pah-pinan naan,
 suma 'tope' na'ko Tenar re' batuur. Mes Kristus
 antaam langsung neu sonaf neno tunan he npeis
 kit anbi Uisneno In human ma In matan. ²⁵ Unu'
 fe', a'naak rais pirsait sin a'naak kou' goe ro he
 ntaam nafan-fain toon-toon anbi Ke'en Akninu'
 nneis-neis naan, ma neik naa mu'it he nnona'
 ma nfee je neu Uisneno. Mes Kristus ka on naan
 fa. In suma nperluu he ntaam no mees' aah,
 neik In naa' akuun. ²⁶ Natuin karu In ro he
 ntaam toon-toon huma' mese' nok a'naak rais
 pirsait amnaa' ein naan, rasi ia in oetn ii nak, In
 ro he nmaet teni-teni, fani-fani, anmurai na'ko
 oras pah-pinan anjair tar antea neno ia, hena' In
 nnoes nain are' tuaf ok-oke' in saant ein. Mes
 In ka nmoe' fa on naan. Fin in oors ii ntea te,
 In nmaet ma njair fua'-turu' suma no mees' aah,
 he nait inporin sanat re' mansian ii nmoe' sin.
²⁷ Batuur een, mansian ii nmaet no mese'. Rarit
 In neem ma nbaiseun Uisneno anbi In human
 ma In matan, he Uisneno anparikas. ²⁸ On naan
 amsa' Kristus. In nmaet nok ranan In nnona'
 ma nfee In tuan he njair fua'-turu' no mees' aah.
 Ma In of ankoen On anfain neem amsa'. Mes
 In ka n'urus fa sanat antein, natuin In nasoup
 mepu nana goen. Mes re' In of an'urus, es re'
 In he nsoi nafetin neu are' tuaf re' nafnekan ma
 nharap neu Ne.☆

 ☆ 9:28 Nai' Yesaya 53:12

10

Kristus anmaet no mees' aah, he mansian ii bisa nmoin reko nok Uisneno nabar-baar

¹ Karu hit troim he tahiin batuur-batuur Uisneno In romin, atoran re' In nasaunt ee neu hit be'i-na'i sin naan, ka mahini' reko fa fe'. Naan suma on re' rais rekon Uisneno sin maofk ein, re' he nfee sin neu kit. Onaim maski atoni' natuin atoorn ein re' naan, neikin mu'it he nafuat sin piut-piut amsa', naan ka bisa nakninu' sin fa batuur-batuur na'ko sin saant ein. ² Fin karu atoorn ein naan bisa naneuk nain saant ein batuur-batuur ate, sin ka neikin ntein' ein fa mu'it he nafuata' sin, natuin sin nnaben ate sin saant ein anbin sin neek ein namnekun nrarin. Te kaah, ka on fa naan. ³ Fin toon-toon ate sin ntotin teni-teni fani-fani, he Uisneno nnoes ma nsaok nain sin saant ein, ⁴ natuin ka neu fa he naa mu'it anmui' kuasa batuur he nait inporin mansian ii sanat.

⁵⁻⁶ Es naan ate, Kristus na'uab on nai oras In ntaam neem anbi pah-pinan ia:

“Uisneno!

Uisneno ka nmariin fa meu mu'i-'turu' ma fua'-turu' bian antein re' sin neik sin.

Sin nroor niis nain mu'it amfa-faun,
he njarin fua'-turu'.

Rarit sin nout mu'it amfa-faun,
he ntotin saok sanat.

Maski on naan amsa', mes Uisneno In nekan ka nmariin fa.

Es naan ate, Uisneno anreek ma nsonu' Kau 'uum a'taam 'eu pah-pinan ia,
he 'jair mansian on re' sin.”

⁷ Rarit Kristus na'uab antein am nak,

“Uisneno! Au es ia, tua!

Au 'uum he 'moe' utuin Uisneno Ho romim,
on re' Ho mafefa kniun' ein antui nain
sin anmatoom nok Kau.”☆

⁸ Onaim re' Kristus na'uab ee ahuunt aan, es
re':

“Uisneno ka nmarinan fa mu'i-'turu' ma fua'-
turu' bian antein re' sin neik sin.
Sin nroor niis nain mu'it amfa-faun,
he njarin fua'-turu'.

Rarit sin nout mu'it amfa-faun,
he ntotin saok sanat.

Maski on naan amsa', mes Uisneno In nekan ka
nmariin fa.”

Onaim maski sin nmoe' natuin batuur-batuur
on re' ka'o Musa in atoorn ein, mes Uisneno In
nekan ka nmariin fa. ⁹ Oras Kristus na'uab am
nak,

“Au 'uum he 'moe' utuin Uisneno Ho romim.”

Rasi naan in oetn ii nak, Kristus ntaam neem
he nnoes ma nsaok nain ranan amnaa', rarit
ansenu' ma nseka' nok raan fe'u. ¹⁰ Fin Uisneno
In romin, es re' Yesus Kristus anjair fua'-turu'
he nmaet no mese' neu mansian kit. Nok ranan
naan, In nmoe' kit tjair atoni kninu' tar antea
nabar-baar.

¹¹ Neno-mneno te, a'naak rais pirsait amnaa'
sin nanaob sin mepun, ma anroron mu'it he
njarin fuat. Te kaah, fua'-tuur' ein naan ka
nmui' fa kuasa he nait nain sanat mansian.☆

¹² Mes hit A'naak Rais Pirsait A'raat Re'uf, es
re' Kristus, annona' ma nfee In tuan he nmate
njair fua'-turu' neu kit. Nok ranan In njair fua'-
turu' no mees' aah, In nfei ma naruru' ranan he

☆ **10:7** Siit Pures-Bo'is sin 40:7-9 ☆ **10:11** Anpoin na'kon Pah
Masir 29:38

bisa tait itporin tain hit mansian ii saant ein ok-oke'. Rarit na' In nnao ntuun On anbi Uisneno In abnapan a'ne'u, anbi bare re' anhormaat ee nnes-neis. ¹³ Anbi bare naan, In npao he Uisneno nmoe' In musu sin na'ruir ein ma nhuum fousun neu Ne.✧ ¹⁴ In fuat no mese' naan, nafeek piut-piut saant ii in kuasan neu tuaf re' Kristus nakninu' nrair sin.

¹⁵ Uisneno In Asmaan Akniun' ee natoon rasi re' naan neu kit msa'. In na'uab niit am nak,

¹⁶ “Hi Usi' na'uab nak on nai:

Au uhake' rais manba'an fe'u 'ok Au ngguin,
 Au 'tao Au atoorn ein et sin teenb ein,
 ma Au 'tui Au preent ein etan sin neek ein.”✧

¹⁷ Rarit In na'uab antein am nak,
 “Au of ka umnau 'tein fa sin saant ein.

Ma Au 'nikan 'ain saa'-saa' re' sin nmoe'-moe' sin naan,

oras sin antanhai Au atoorn ein.”✧

¹⁸ Rasi naan in oetn ii nak, karu Uisneno nsako nrair tuaf ein sin saant ein, sin ka nperluu fa he neik fua'-turu' ntein, he nhainiik Uisneno In nekan.

Hit kais tamtau ttein he tbaiseun Uisneno

¹⁹ Aok-bian arki! Nai' Yesus n'opa' nrair In naa' ee he nhainiik Uisneno In nekan. Etun oras ia, hit kais tamtau ttein he teem ma tbaiseun Nggoe, et In Baer Akninu' nneis-neisi et sonaf neno tunan. ²⁰ Mimnau Ke'en Akninu' nneis-neisi mnaa' naan! Anbi naan anmui' tai-eno' noo kou' goes re' anpiir' ee ma n'eka' tuaf he kais antaman ma nbaiseun langsung anbi Uisneno. Mes nok ranan Nai' Yesus anmaet re' naan, In

✧ **10:13** Siit Pures-Bo'is sin 110:1 ✧ **10:16** Nai' Yereimias 31:33

✧ **10:17** Nai' Yereimias 31:34

nfei ma naruru' raan fe'u, he tuaf bisa na'uab ma nbaiseun langsung neu Uisneno. ²¹ Anneis-neis, Nai' Yesus anjair a'naak rais pirsait re' ma'tain re'uf, re' antuthae ma n'ator Uisneno In uim je nanan. ²² Natuin naan njair hit hak ate, onaim iim he hit ttaam atbaiseun ma ta'uab langsung tok Uisneno. Mes hit ro he tpirsai batuur-batuur teu Ne nok neek amneot ma ammonot. Fin Nai' Yesus In a'maten naan nakninu' nain hit nekak nanan, tar antea hit ka tatenab fa piut-piut rais maufinu. Ma hit ro he tmoni kninu' msa', on re' a'naak rais pirsait amnaa' ein, ro he naniun fe', na' antaman he ntuthae Uisneno.✧ ²³ Iim he hit arkit atnaa' taher-heran saa'-saa' re' hit atmanaku' sin anmatoom nok Uisneno. Ma hit ro he tafnekan ma tharap teu Ne, ma kais tatenab, natuin In ro batuur-batuur anmoe' natuin saa' re' In nba'an anrair je. ²⁴ Ma iim he hit ttaim ranan he to'en ma taskau hit aok-bian apirsait ein, he hit arkit takrira' rais manekat kou'-ko'u ma tmeup meup reko huma'-huma'. ²⁵ Au 'neen a'rair anmui' tuaf bian re' ka nabua ntein' ein fa nok sin aok-bian apirsait ein. Kais on naan, tua! Fin hi ro he mibua he mmaha'tanin nekaf es nok es. Anneis-neis oras re' he Uisneno ankoen On anfain neem re' naan, ka 'roo fa goen. Mimnaub sin on re' naan, tua!

²⁶ Aok-bian manekat arki! Hit tahiin namnuut goen anmatoom nok Kristus In raan reko. Mes karu hit tkoit Nai' Yesus, ma atmoe' sanat piut-piut ate, in oetn ii nak, ka tiit attein fa fua'-turu' 'teta' re' bisa nnoes nain saant ein naan. ²⁷ Hit suma tpao nok rasi mtaus he Uisneno

✧ **10:22** A'naak Rais Pirsait ein sin Atoran 8:30, 16:4, Nai' Yeskial 36:25

nkoen On anfain neem ma nhukun kit. Fin ai apinat marara' abar-barat naan, nabarab anrair he ntoup ma nout niis tuaf-tuaf re' anraban Uisneno. ✧ ²⁸ Unu' fe', karu anmui' tuaf antanhai ka'o Musa in atoran, ma anmui' saksii tuaf nua'-teun on naan ate, tuaf asanat naan ro he ntoup hukun a'maten, ma ka tiit fa rais saok sanat antein. ✧ ²⁹ Mes oras ia, karu anmui' tuaf ankana'paar Uisneno In Anah, naan on re' in nkana'paar Nai' Yesus In naa' re' nat'oop he nakninu' nain tuaf naan. Ma in ka ntoe fa Uisneno In rais manba'an re' In nahaek ee ma anfuut goe anpaek naa' re' naan. Ma in nato'ob Uisneno In Asmanan re' nakrira' nrair In nekan arekot neu tuaf naan amsa'. Neu mitenab miit! Tuaf on re' naan of nasaah hukun ma'fena' nneisi ntein na'ko tuaf re' antanhai ka'o Musa in atoran. ✧ ³⁰ Uisneno na'uab niit am nak, “Au 'mui' hak he 'baras atoni' in maufinun.

Ma Au ro 'tebes he 'moe' on re' naan.”

Ma matu'i ntein am nak,
“Uisneno naan, Usi'.

In of nasanut hukun neu Iin na.” ✧

³¹ Mimnau te Uisneno anmoin nabar-baar! Mansian ii of aon ee napiip, karu Uisneno anheek naan sin!

³² Hi ro he mimnau oras hi fe' mmurai mihiin rasi anmatoom nok Kristus, rarit hi teenb ein kniun' ein. Oras naan, maski hi mipein ha'mu'it susat nana'renat kou'-ko'u, mes hi maran ma mtahan ma mpirsai piut meu Kristus. ³³ Anmui' tuaf re' ankana'paar ki, ma namae ki nbi too

✧ **10:27** Nai' Yesaya 26:11 ✧ **10:28** Surat re' Nareta' Nafani' Raan A'honis 17:6, 19:15 ✧ **10:29** Anpoin na'kon Pah Masir 24:8 ✧ **10:30** Surat re' Nareta' Nafani' Raan A'honis 32:35,36

mfaun ein sin humak ma sin matak, sin sonak ma sin atnanak. Anmui' tuaf re' anmoe' on naan amsa' neu hi partei apirsait ein. ³⁴ Hi mkasian ma mikrira' neek reko meu tuaf-tuaf re' nataam sin et bui. Karu abakat nabaak naan hi bare' hi mtoup goe nok neek sabaar ma oe tenes, natuin hi mihini mrair mak, hi re' naan of amtoup rais reko nneis, re' abaakt ee ka bisa nabaak ee fa. ³⁵ Etun hi ro he mnaa' miherheran hi rais pirsait naan. Natuin Uisneno of anbaras neu ki on re' naan. ³⁶ Onaim maran ma mtahan miheer! Natuin karu hi mmo'e mrair mituin Uisneno In roimn ee piut, hi of amtoup saa'-saa' re' In nba'an anrair he nfee ma nnona' neu ki. ³⁷ Uisneno In mafefa kniun' ein antuin anmatoom nok Tuaf re' he nkoen On nfain neem am nak,

“Ka 'roo fa goen ate, Tuaf re' he nkoen On nfain neem re' naan, anpoi ma nboor neem.

Kais am'oer, fin In ka npa-pao fa.

³⁸ Tuaf re' in neekn ee namneo ma namnoon, Uisneno of ansoi nafeitn ee, natuin in npirsai neu Kau.

Mes karu anmui' tuaf antet-koit na'ko Kau,

Au nekak ia ka nmariin fa.”[☆]

³⁹ Mes hit re' ia, ka tuaf re' attet-koit fa ta'ko Uisneno. Fin tuaf humaf on re' naan, of anbetis ma ma'bata' na'ko Ne. Mes hit re' ia, apirsait teu Uisneno. Rarit Uisneno ansoi nafetin kit he tmoin tabar-baar tok Ne.

11

Hit ro he tpirsai piut teu Uisneno, nahuum on re' ahuunt ein

[☆] **10:38** Nai' Habakuk 2:3-4

¹ Karu hit tpirsai Uisneno, in oetn ii nak, hit neek ii na'kii' piut tok Ne. Natu in karu In nahake' nrair rais manba'an he nmoe' saa' es ate, hit tahiin tak, In ro tebes anmoe' natu in manba'an naan. Maski hit ka ttoup fa saa'-saa' amsa', hit tpirsai piut aah. ² Anmui' tuaf-tuaf na'ko hit be'i-na'i sin re' batuur-batuur anpirsain on naan. Nok ranan naan, Uisneno antoup sin nok reko.

³ Pah-pinan ma neon goe tnanan re' hit tiit sin oras ia, hit tpirsai tak, Uisneno es anmoe' sin ok-oke'. Mes In ka nmoe' sin fa npaek baer es, re' anmui' nain, re' mansian ii bisa niit ma nre'o. Are' saa'-saa' re' ia, anjarin natu in In na'uab anpaek In Kabin ma Prenat kuun.✧

Nai' Habel

⁴ Nai' Habel anpirsai Uisneno. Nok ranan naan, in neik fua'-turu' re' reko nneis na'ko in tataf nai' Kain. Uisneno antoup reko neu nai' Habel nok in fua'-turu' naan, natu in in neekn ee namneo ma namnoon. Onaim maski in nmate 'roo goen, mes hit bisa tanoni' fe' na'ko nai' Habel, natu in in rais pirsait naan.✧

Nai' Hanok

⁵ Nai' Hanok anpirsai Uisneno msa'. Nok ranan naan, Uisneno nait nasaeb ee ntaam neu sonaf neno tunan, he in kais anmaet. Tuaf-tuaf naim je, mes ka niit ee fa, natu in Uisneno nait nasaeb anrari. Uisneno antoup goe nok reko, fin

✧ **11:3** Reta' Ahun-hunut 1:1, Siit Pures-Bo'is sin 33:6,9, Nai' Yohanis 1:3 ✧ **11:4** Reta' Ahun-hunut 4:3-10

Uisneno nak, “Nai' Hanok ia, tuaf re' anharineb Au nekak.”✧

⁶ Onaim aok-bian arki! Batuur-batuur kniun een. Uisneno ka ntoup reko fa neu tuaf-tuaf re' ka npirsai Je fa. Fin tuaf-tuaf re' he neem ma ntaam neu Uisneno, in ro he npirsai nak, Uisneno naan ro batuur-batuur et na. Ma in imsa' ro he npirsai nak, Uisneno nroim he nturun ma nbaab tuaf-tuaf re' neem ma naim Je.

Nai' Noh

⁷ Nai' Noh anpirsai Uisneno msa'. Nok ranan naan, Uisneno natoon nain ee mnak, “Noh! Mumnu, he! Au of ureu' pah-pinan ia 'paek noe mahenu' ko'u, re' mansian ii ka niit-niit ee fa fe'.” Maski nai' Noh ka niit niit fa on re' naan amsa', in nneen ma natniin Uisneno. In nmo'e bnao oe he nasaeb in uim je nanan, he sin napenin fetin na'ko siraak. Natuin in rais pirsait naan, Uisneno naan ee njair atoin neek amneot ma ammonot. Mes mansian bian ein ok-oke' re' ka npirsain fa, Uisneno nasanut hukun ma'fena' neu sin.✧

Ka'o Abraham nasaitan in kua mnaa'

⁸ Ka'o Abraham anpirsai Uisneno msa'. Nok ranan naan, Uisneno no'en ma nhaman ka'o Abraham am nak, “Abraham! Ampoi ma mnao musaitan ho kuan naan, mnao nai meu bare re' au of ukrira' ma ururu' ko. Bare naan of anjair pusaak neu ho sufa'-ka'uf sin.” Anneen on naan ate, in nmoe' natuin Uisneno In romin, maski in ka nahiin fa he nnao neu mee.✧ ⁹ Oras in ntea

✧ **11:5** Reta' Ahun-hunut 5:21-24 ✧ **11:7** Reta' Ahun-hunut 6:13-22 ✧ **11:8** Reta' Ahun-hunut 12:1-5

bare naan, in nahake' tenar, ma natua on re' anao-amnemat anbi bare re' Uisneno anba'an he nfee je neu na. Rarit in anah nai' Isak nok in upuf nai' Yakop natuan anbin naan amsa', natuin Uisneno anba'an anrair he nfee bare naan he njair sin pusaak.✧ ¹⁰ In nafnekan ma nharap he in of anmoni nbi kota ma'tain es. Fin Uisneno kuun es re' anmoe' gambaran he nafena' kota naan.

Ain Sara'

¹¹ Ain Sara', ka'o Abraham in fee, anpirsai Uisneno msa'. Maski in ka nahoni' niit fa fe', ma namnais re'-reu'f een, mes Uisneno nmoe' je njair ain uuf neu pah kou' goes. Fin in npirsai nak, Uisneno ro tebes anmoe' natuin saa' re' In nba'an anrair je naan.✧ ¹² Nok ranan naan, maski in namnais re'-reu'f een amsa', in bisa nahoni' ma nasuuf amfa-faun fe', tar antea ka tiit fa tuaf re' bisa nsoi' naan sin. Fin sin amfauk ein on re' kfuu et neon goe tnanan, ma on re' snaen et tais je ninin.✧

Sin nai'-ka'o re' anpirsain ma nafnekan neu pah es

¹³ Hit be'i-na'i sin, ka'o Abraham, ka'o Isak, ma ka'o Yakop anpirsain piut-piut neun Uisneno msa' tar antea oras sin nmaten. Mes sin ka ntoup fa pah re' Uisneno anba'an anrair je naan. Maski on naan amsa', sin nafnekan ma nharap piut nok neek marine, natuin sin niit anrair bare naan na'ko 'roo. Fin sin nmanauk ein nak, sin suma anao-amnemat re' natua ntahan anbi pah-pinan

✧ **11:9** Reta' Ahun-hunut 35:27 ✧ **11:11** Reta' Ahun-hunut 18:11-14, 21:2 ✧ **11:12** Reta' Ahun-hunut 15:5, 22:17, 32:12

ia.✧ ¹⁴ Te kaah, batuur-batuur tuaf re' na'uab on re' naan, sin npa-paon he napein bare he njair sin auf pusaak. ¹⁵ Karu pah naan re' hit nai'-ka'o sin anpa-pao goe naan, es re' ka'o Abraham in kua mnaa' ate, ro tebe, ro nmui' oras mainuan he sin nfanin neun naan. ¹⁶ Mes pah re' sin npa-pao goe naan, es re' pah re' ma'tani' nneis et sonaf neno tunan. Nok ranan naan, Uisneno antoup sin reko he sin njarin Iin na. Fin In nabarab anrair kota es neu sin et sonaf neno tunan.

Ka'o Abraham annona' ma nfee in anah nai' Isak

¹⁷⁻¹⁸ Ka'o Abraham anpirsai batuur-batuur neu Uisneno msa', oras Uisneno nsoba' in neek pirsait naan. Nok ranan naan, in nmoe' natuin Uisneno In aprenat he nnona' ma nfee in anah nai' Isak he njair fua'-туру'.✧ Te kaah, unu' fe'e te, Uisneno nahake' rais manba'an anmatoom nok ri'ana' naan am nak, "Na'ko ho anah nai' Isak re' ia, ho of mupein sufa'-ka'uf amfaun, tar antea sin njarin pah es, re' ma'tain re'uf."✧ ¹⁹ Mes ka'o Abraham natenab anrair nak, Uisneno anmui' kuasa he namonib nafani' amates. Batuur on naan, oras naan in on re' napein nafani' in anah re' anjari nrair fua'-туру'.

Ka'o Isak

²⁰ Ka'o Isak anpirsai Uisneno msa'. Nok ranan naan, in ntoit he Uisneno anfee tetus-athoen neu in anah nai' Yakop ma nai' Esau.✧

✧ **11:13** Reta' Ahun-hunut 23:4, 1 Mape'o 'Naof Pah Isra'el ma Pah Yahuda 29:15, Siit Pures-Bo'is sin 39:13 ✧ **11:17-18** Reta' Ahun-hunut 22:1-14 ✧ **11:17-18** Reta' Ahun-hunut 21:12 ✧ **11:20** Reta' Ahun-hunut 27:27-29,39-40

Ka'o Yakop

²¹ Ka'o Yakop anpirsai Uisneno msa'. Nok ranan naan, oras in he noi nmate te, maski in a'sau'n ee na'kuub ma nnaa' teas, mes in nhaek he na'ruri' ma na'besan Uisneno. Rarit in ntoit Uisneno nfee tetus-athoen neu in anah nai' Yusuf in aanh ein.✧

Ka'o Yusuf

²² Ka'o Yusuf anpirsai Uisneno msa'. Oras in he noi nmate te, in npirsai nak, Uisneno of napoin In too Israelas sin na'kon pah Masir. Es naan ate, in nba'an nain sin, he sin ro he neik in nuif ein, karu sin nasaitan pah Masir.✧

Ka'o Musa in ainaf-amaf

²³ Ka'o Musa in ainaf-amaf anpirsain Uisneno msa'. Oras in ainf ee nahonis anrair je, sin na'koor ee tar antea funan teun, natuin sin nkius in aon naan reokn ii kah een. Ma sin ka namtausan fa usif pah Masir amsa', maski in aprenat iin na nak, "Amneoka' miis main are' ri'aan moen ein ok-oke' re' bifee Ibranis sin nahonis sin."✧

Ka'o Musa

²⁴ Oras ka'o Musa na'nae neem, in anpirsai Uisneno msa'. Natuin unu' fe'e te, usif pah Masir in aan fetu nsee' naan ee njair in anah. Maski on naan amsa', mes in ka nroim fa he atoni' naan ee njair usif pah Masir in nonot-asar.✧ ²⁵ In natenab nak, reko nneis in nmoni nbi susat nabu-bua nok

✧ **11:21** Reta' Ahun-hunut 47:31—48:20 ✧ **11:22** Reta' Ahun-hunut 50:24-25, Anpoin na'kon Pah Masir 13:19 ✧ **11:23** Anpoin na'kon Pah Masir 2:2, 1:22 ✧ **11:24** Anpoin na'kon Pah Masir 2:10-12

Uisneno Iin na. Karu in he nmariin mes in nmoin nok amaufiunt ein, naan ka 'roo fa te, oek' een. ²⁶ In nkonan biak ein ankana'paar ee, natuin in nafnekan ma nharap Kristus, Tuaf re' Uisneno anba'an anrair he nsoun Ee neem. In naran ma ntahan on re' naan, natuin in nahiin Uisneno of anbaras neu ne nok upan re' reko nneis na'ko are' kanan a'mu'if anbi pah Masir naan.

²⁷ Ka'o Musa npirsai Uisneno msa' oras in ntoit mainuan neu usif pah Masir he neik hit be'i-na'i sin anpoin na'kon pah naan. Maski usif naan natoo' mates, mes ka'o Musa ka namtausn ee fa. Ka'o Musa npirsai piut neu Uisneno re' ka mamnita' fa, nahuum on re' in niit kuun Ee goen.✧

²⁸ Ka'o Musa npirsai Uisneno msa' oras sin nabaarb ein he nasaitan pah Masir. In nmoe' natuin Uisneno In aprenat, ma nreun hit be'i-na'i sin nmo'en Paska ahunut. Oras naan sin nroron a'bib-kase he njair fua'-turu'. Rarit sin nait naa' 'bib-kase naan ma nahoesb ee njair tanar anbi sin umin. Mabe' naan, Uisneno In ameput na'ko sonaf neno tunan neem ma na'maet nain are' kanan aan moen unu anbi pah Masir. Mes in ka ntaam fa he nroor hit be'i-na'i sin anbi sin umin, natuin in niit naa' anbi eno'.✧

Hit be'i-na'i sin

²⁹ Oras hit be'i-na'i sin anpoin na'kon pah Masir, sin npirsain Uisneno msa'. Es naan ate, Uisneno npoor ma nbia nbatis oe tasi anbi Tais Me'e, he sin nnaon ma npoin ntean panin

✧ **11:27** Anpoin na'kon Pah Masir 2:15 ✧ **11:28** Anpoin na'kon Pah Masir 12:21-30

anbin auf meto'. Mes soraurs ein pah Masir re' anriu' natuin sin naan, anreem anmaten oras sin ntaman nbin bare naan.✧

Ain Rahap

³⁰ Oras hit be'i-na'i sin antaman ntean nrarin pah Kana'an, sin anpirsain Uisneno msa'. Sin natuin In aprenat. Sin nnaon nfuun natef-tefan kota Yeriko in raem kotif neno hiut. Onaim rame' naan anpee' ma ntaikoib nain.✧

³¹ Anmui' naan bifee a'hake' es anbi kota naan, kaan ee bi Rahap. Natuin in npirsai Uisneno, es na' in ntoup nok reko atoin asuntirus na'kon too Israelas sin, ma in na'koro' sin anbin in umi. Rarit Uisneno nareu' nain kota Yeriko nok nain in tuak ein, natuin sin ka nromin fa he nneen ma natniin Ee. Mes Uisneno namnau ain Rahap. Ain Rahap anmoin, natuin in neek pirsait naan.✧

Tuaf amfaun bian anpirsain neu Uisneno msa'

³² Au bisa u'uab amnanu'-mnanu' a'tein fe' anmatoom nok tuaf bian antein re' anpirsain neu Uisneno. Mes au ka 'mui' fa oras he ureta' tar namnuut anmatoom nok nai' Gideon, nai' Barak, nai' Simson, nai' Yefta, nai' Daut, nai' Samuel, ma Uisneno In mafefa kninu' bian sin.✧

³³ Sin ar-arsin anpirsain neun Uisneno. Nok ranan naan, bian nisan anbin makenat nok usif bian. Bian anna'an aprenat nok neek amneot ma ammonot, he npeis tuaf re' ka nmui' fa sanat, ma anhukun re' asanat. Bian antoupun

✧ **11:29** Anpoin na'kon Pah Masir 14:21-31 ✧ **11:30** Nai' Yosua 6:12-21 ✧ **11:31** Nai' Yosua 6:22-25, 2:1-21 ✧ **11:32** Afeek Rasi sin 6:11—8:32, 4:6—5:31, 13:2—16:31, 11:1—12:7, 1 Nai' Samuel 16:1—1 Uisf ein sin Reta' 2:11, 1 Nai' Samuel 1:1—25:1

saa' re' Uisneno anba'an anrair je. Ma bian niis naan meo'-ro'i singa.✧ ³⁴ Bian na'maet ai piin ko'u. Bian Uisneno nsoi nafetin sin na'ko marorot anpaken suni'. Bian ka na'be'in fa, mes Uisneno nha'tain sin ma nfeen sin a'be'if ma'tani'. Bian Uisneno nfeen sin a'be'if ma'tani' he bisa nmakenan, tar sin bisa nbeson ma nriu' na'roob soraur musu sin na'kon bare bian.✧ ³⁵ Bian bifee-fee re' antoup nafani' sin nonot-asar sin, re' Uisneno namonib nafani' sin.

Mes bian napenin ha'mu'it ma'tani', natuin sin npirsain neun Uisneno. Sin nromin he nmaten ate es re' reko nneis ji, he sin kais annaon koit Uisneno. Fin sin ka nteet nafeek fa sin rais kua'-nonot nok Uisneno. Onaim sin nafnekan ma nharap nak, Uisneno of nait sin he napenin 'monit arekot anneisi ntein et sonaf neno tunan.✧ ³⁶ Tuaf bian anratin ma nkana'paar sin, bian napenin beso'. Bian sin haek ein anhaip sin anpaken a'hapi' re' anteek ee nak, pasung anbi bui.✧ ³⁷ Bian anmaten natuin anpoir niis sin. Bian anheo niis sin. Bian anmaten suni'. Bian nma'mu'in nmaten, suma nmu'i haa tais anbi aon re' anmoe' je na'ko pasu, natuin atoni' nasusab sin, tar anriu' sin,✧ ³⁸ ma sin naen natuan nbin baer ruman, nbin a'toe'f ein, anbin nuat ein, ma anbin koon ein. Tuaf ankana'paar atoin ein re' ia, ma anriu' sin nnaon natuan nbin baer re'uf. Te kaah, sin pirsait naan ma'tain besi,

✧ **11:33** Nai' Danial 6:1-27 ✧ **11:34** Nai' Danial 3:1-30 ✧ **11:35** 1 Uisf ein sin Reta' 17:17-24, 2 Uisf ein sin Reta' 4:25-37 ✧ **11:36** 1 Uisf ein sin Reta' 22:26-27, 2 Mape'o 'Naof Pah Isra'el ma Pah Yahuda 18:25-26, Nai' Yeremias 20:2, 37:15, 38:6 ✧ **11:37** 2 Mape'o 'Naof Pah Isra'el ma Pah Yahuda 24:21

tar antea tuaf anbi pah-pinan ia, ka pantas fa he natua nabua nok sin.

³⁹ Uisneno anbo'is sin arsin re' ia, natuin sin anpirsai Je. Mes antea oras sin nmaten amsa', sin ka ntoup fa saa' re' Uisneno anba'an anrair je naan. ⁴⁰ In he nmoe' natuin In rais manba'an naan, anpaek ranan re' reko nneisi. Natuin In nroim he hit arkit bisa tmoin piut tok Ne: es re' hit arkit re' ia re' tahini traair Kristus, ma sin re' anmaten nrarin un-unu' naan.

12

¹ Onaim on mee, hit amonit oras ia? Hit on re' tuaf re' nok anbi mnaenat. Hit be'i-na'i sin re' anpirsain neun Uisneno un-unu' naan, sin on re' akiust ein, re' na'haba' kit. Mes karu hit atmafuuat fe' tok hit saant ein, naan hit amnaent ii ma'fena'. Es naan ate, hit ro he tait itporin hit saant ein ok-oke', he hit bisa taen ta'bei'. Fin Uisneno anpiir nain kit arkit een, he hit tok atbi mnaenat re' ia, onaim hit ro he taran ma ttahan tar antea fenis amsoput. ² Ma oras hit ttaen, hit kais atniik ai' tasneku' 'rii ma 'ne'u, mes atkius teu Nai' Yesus anmees. Natuin In es re' anfei ma naruru' ranan he hit bisa tpirsai Uisneno. Ma In of anturun ma nbaab kit he bisa tpirsai piut-piut tar namsoup. Hi mimnau, ai'? Oras Nai' Yesus napein ha'mu'it ma ma'ne'at anbi hau nehe, atoni' anraitn Ee ma nkana'paar Ee, mes In naran ma ntahan. Natuin In nahiin nak, In ha'mu'it naan oek' een, In neekn ee of anmainua ma nmariin. Naan ro batuur. Fin In nmate nrair, onaim Uisneno nait nasaeb Ee ma ntook et Uisneno In abnapan a'ne'u, he Sin nua sin

napreent ein bu'-bua'. ³ Maski biak ein anmo'en maufinu neu Ne, mes In naran ma ntahan piut. Onaim hi kais amnikan Nai' Yesus In ha'mu'it ia, he hi bisa maran ma mtahan piut-piut amsa', ma kais am'oer.

Uisneno nroim he nakain kit he nanoni' kit, on re' mahoint es nanoni' in anah

⁴ Hi mraban amrair rais maufinun, mes hi ka mraban ma'tani' tar antea hi naa' ii nsai fa fe'. Ai', on mee? ⁵ Of oni' hi mnikan amrair Uisneno In Kabin ma Prenat re' In natoon anrair neu ki, on re' mahoint es na'uab nok in anah am nak, "Anah!

Karu hit Usi' anhukun he nanoni' ko, he ho mmoin mutuin raan a'honis amneot-amnonot,
ho kais amkoson uab ein naan ma musmeru' sin!

Ma karu In nakaina' he nanoni' ko,
ho nekam naan kais nabait.

⁶ Hit Usi' nakaina' he nanoni' tuaf re' In neek ee. Batuur, are' tuaf ein ok-oke' re' In antoup sin anjarin In aanh ein,

In ro he nakaina' sin he nanoni' sin."☆

⁷ Onaim karu Uisneno nakaina' he nanoni' ki he mmoin mituin ranan re' batuur ate, maran ma mtahan ambi rasi naan. In nmoe' on re' naan, natuin hi mjari mrair In aanh ein. Fin mahoint ii ro he nakaina' ma nanoni' in anah, tar antea ri'ana' naan nahiin 'monit re' natuin raan reko. ⁸ Fin karu Uisneno ka nakaina' fa he nanoni' ki on re' In anah bian sin, rasi naan in oetn ii nak, hi re' naan, hi ka anah Uisneno ki fa.

☆ 12:6 Nai' Ayup 5:17, Fainekat 3:11-12

⁹ Hit biasa thormaat hit mahoint ii anbi pah-pinan ia, natuin in nakaina' he nanoni' kit oras hit ana' fe'. Naan ro batuur. Mes anneis-neisi ntein' ii, hit ro he tneen ma tatniin Uisneno, natuin In re' naan, hit Ama' et sonaf neno tunan, ma In nroim he nakaina' kit he nanoni' kit he tmoin tatuin In raan amneot ma amnonot. ¹⁰ Hit mahoint ein, nakaina' he nanoni' kit suma oras akre'-reo' goah, natuin saa' re' in nak reko. Mes Uisneno nahini nneis saa' re' tperluu he hit tanoin ee. Es naan ate, In nakaina' he nanoni' kit he tmoni kninu' on re' Iin. ¹¹ Batuur! Karu nakaina' kit, hit neek ii ro nabait. Mes a'roo'-roo te, hit neek ki n'oeteen ma na'tena', natuin hit tahini trair he tmoin tatuin Uisneno In romin.

¹²⁻¹³ Aok bian ar-arki! Miheran hi 'niim ein re' an'oren nrarin naan, ma mha'kaaf hi haem ein re' ma'feen' ein naan. Kais maen penu-penu, mes maen amneof aah, he bian re' ka bis-bisa fa goen ate, bisa napenin ma'tanif he bisa naenan piut. Hi ro he mha'tain hi neekm ein naan, he maran ma mtahan, ma mpirsai meu Kristus.*

Kais amtorak Uisneno In nekan arekot neu ki

¹⁴ Aok-bian apirsait ein meu Kristus! Hi ro he mpasan hi tuam ein naan he mmoin nok rais rame' es nok es. Ma m'usaha he mmoin nok akninu'. Fin tuaf-tuaf re' ka kninu' fa, ka bisa niit fa Uisneno.

¹⁵ Ammaha'tanin ma mma'haba' es nok es he kais anmui' tuaf na'ko ki re' ntet-koit ma nasaitan ki, tar sin ka nnaben naan fa Uisneno In nekan arekot. Ampanat mirek-reko' he kais anmui' tuaf neekn ee nameen anbi hi sonam

* **12:12-13** Nai' Yesaya 35:3, Fainekat 4:26

ma hit tnanam. Fin karu on naan ate, in of anjair on re' raso re' nameun ma nareu' too mfaun. ☆ 16 Ampanat amsa' he kais anmui' tuaf re' nbeoka' in nekan ma anteib neu rais sona'. Rarit ampanat amsa' he kais anmui' tuaf re' ka ntoe fa Uisneno, on re' nai' Esau. Nai' Esau naan, ka'o Isak in aan moen unu. Neon goes ate, nai' Esau nfain neem nok tai ruman. In ntoti mnahat a'piik es na'ko in orif nai' Yakop. In nfee in hak aan moen unu njair baen neu mnahat naan. ☆ 17 Mes hit tahiin tak ka 'roo fa te, nai' Esau anmei' jon. Natuin oras aam Isak he ntoit Uisneno he nfee tetus-athoen neu aan moen unu, nai' Isak ka bisa ntoti ntein fa goen, natuin nai' Esau na'sosa' nporin nok ruum-ruum aah hak aan moen unu naan. Etun maski in nkae npin-pinus amsa', in ka bisa napein nafani' fa saa' re' in nporin anrair je. ☆

18 On nai, aok-bian arki! Hit bisa teem atrair teu Uisneno In human ma In matan, tatuin raan fe'u re' In nfei nrair je neu kit. Mes un-unu' fe'e te, hit be'i-na'i sin ka bisa fa on naan. Oras naan Uisneno nahake' rais manba'an nok sin, oras sin nbin a'toe'f es, kaan ee Sinai. Anbi 'to'ef naan in tunan anmui' ai apinat. Anmui' ain ko'u msa'. Ma 'to'ef naan meis'ookn ii an'aum naan ee msa', tar sin namtaun nmaten. 19 Sin anneen toi's ee nahaan, rarit Uisneno In hanan re' ma'tain re'uf naan anpoi neem na'ko 'to'ef naan. Anneen Uisneno In uaban on naan ate, sin namtaun piut, tar antea sin ntoit ka'o Musa

☆ 12:15 Surat re' Nareta' Nafani' Raan A'honis 29:18 ☆ 12:16 Reta' Ahun-hunut 25:29-34 ☆ 12:17 Reta' Ahun-hunut 27:30-40

nak, “Airoo! Hai ka bisa mtahan maan fa goen. Hanaf ia ma'tain re'uf!”[☆] ²⁰ Sin batuur-batuur ka bisa ntahan naan fa, natuin saa' re' Uisneno naprenat neu sin naan, ma'feen re'uf. Natuin in naprenat am nak, “Ka bole fa he nmui' tuaf anteri nbi 'to'ef ia! Maski mansian, ai' mu'it! Sekau-sekau re' anteir a'to'ef ia, ro he mpoir miis ne nmaet.”[☆] ²¹ Saa' re' sin niit ee anbi 'to'ef naan, batuur-batuur sin napipin sin aok ein, nasmanan ma namtaun nmaten. Tar antea ka'o Musa msa' npuus anmeit-meit.[☆]

²² Mes oras ia, ranan he tnao teu Uisneno natsoi nrair, ma hit bisa ta'uab langsung tok Ne. Oras ia hit teem teu toe'f es, kaan ee, Sion. Anbi bare naan, kota Yerusalem et naa. Ka kota Yerusalem pah-pinan ia fa, mes kota Yerusalem fe'u et sonaf neno tunan, es re' Uisneno In bare 'tokos. Anbi naan, Uisneno In ameupt ein sonaf neno tunan namfa-faun, re' anfeest ein rame-rame. ²³ Anbi kota naan amsa', anjair bare re' na'bu' naan apirsait ein neun Kristus. Fin Uisneno anmo'e nrair daftar he ntui sin kaank ein tuaf mese'-mese' et sonaf neno tunan. Anbi naan amsa' Uisneno of anparikas ma nfee nilei neu tuaf-tuaf sin ok-oke' sin a'moink ein. Anbi bare naan amsa' are' tuaf ein ok-oke' nabuan, re' un-unu' fe'e te, Uisneno antoup sin reko, natuin sin anpirsain neu Ne. Anbi naan, sin anjarin tuaf re' nanokab ma namtiis. ²⁴ Ma nbi naan amsa' Nai' Yesus et naa, re' anjair nete-ranan

[☆] **12:19** Anpoin na'kon Pah Masir 19:16-22, 20:18-21, Surat re' Nareta' Nafani' Raan A'honis 4:11-12, 5:22-27 [☆] **12:20** Anpoin na'kon Pah Masir 19:12-13 [☆] **12:21** Surat re' Nareta' Nafani' Raan A'honis 9:19

neu Uisneno nok mansian. Nai' Yesus anmaet, In naa' ee nat'oop ma nasai, he Uisneno bisa nahake' rais manba'an fe'u nok kit. Etun Nai' Yesus In naa' naan, anhainiik Uisneno In nekan. Mes re' ia a'teta' na'ko nai' Habel in naa' anbi reta' ahun-hunut naan. Oras nai' Kain anroor niis nai' Habel, nai' Habel in naa' re' nat'oop naan, anmoe' Uisneno In neekn ee maputu', tar antea In nasanut ma nfee hukun neu nai' Kain.✧

²⁵ Ampasan hi ruikm ein mirek-reko' he mneen saa' re' Uisneno anroim he na'uab ee neu ki. Kais ammoe' on re' hit be'i-na'i sin, re' antorak nain ka'o Musa in uaban oras in njair Uisneno In mafefa kninu' anbi pah-pinan. Rarit Uisneno nasanut ma nfeen sin hukun. Saa' antein hit! Karu hit ka tneen ma tatniin fa Uisneno In uaban na'ko sonaf neno tunan, ro batuur In hukun kit ma'fena' nneis.✧ ²⁶ Oras hit be'i-na'i sin anhaken nbin a'to'ef Sinai, Uisneno In haan ee ma'tain re'uf, tar antea auf gui na'beko'. Oras ia, In nahake' rais manba'an nak,

“Au of u'beko' auf gui no goes antein,

mes ka neu fa haa, he auf gui nmees na'beko',

fin neon goe tnaan ee msa' na'beko' nok.”✧

²⁷ Oras Uisneno na'uab nak, In he nmoe' are' saa'-saa' ii na'beko' “no goes antein”, in oetn ii nak, Uisneno nroim he na'beko' saa'-saa' ein re' In nmoe' sin, et neon goe tnanan ma pah-pinan, tar antea re' ka bisa ntahan fa, namnekun nfnin. Re' mee bisa ntahan ate, naan natua nabaar.

✧ **12:24** Reta' Ahun-hunut 4:10 ✧ **12:25** Anpoin na'kon Pah Masir 20:22 ✧ **12:26** Nai' Hagai 2:6

28 Uisneno annaa' aprenat et sonaf neno tunan. Naan ka bisa namreu' fa. Reko kuun! Natuin In nroim he ntoup ki mtaam amjair Iin na nbi bare naan, iim arkit attoit makasi teu Ne, ta'ruri' ma ta'bees teu Ne, ma taikas ta'rat-raatn Ee natuin In re' naan ma'tain re'uf! 29 Mes hit ro he tpaant ok amsa', natuin Uisneno In to'os, nahuum on re' ai re' nout nain are' kanan saa'-saa' ii ok-oke' tar antea nputun nmaten.✧

13

Hit ro he tmoin reko es nok es

1 Aok-bian manekat arki! Anmui' naan rasi bian antein re' au he umnaub sin 'eu ki.

Kais amnikan he mmaneek piut meu hi aok-bian apirsait ein.

2 Kais amnikan he mtoup tuaf-tuaf re' hi ka mihiin sin fa oras neman npoin ki. Natuin anmui' hit aok-bian sin re' anmoe' niit ee on re' naan. Namuni te na' sin nahinin nak, tuaf ein re' naan Uisneno In ameupt ein na'kon sonaf neno tunan.✧

3 Kais amnikan he mnao mkius abitan bui, re' antaman bui natuin sin npirsain neun Kristus. Es naan ate hi ro he mturun ma mbaab sin, on re' hi es re' amtaam bui.

Kais amnikan he mturun tuaf-tuaf re' napenin ha'mu'it. Am'urus sin rek-reko, on re' hi kiim es re' mipein ha'mu'it naan.

4 Rais matsaos et bifee-atoni' naan, kninu'. Mes kais-kaisa' matsao kninu' naan, anjair 'oemetan.

✧ 12:29 Surat re' Nareta' Nafani' Raan A'honis 4:24 ✧ 13:2 Reta' Ahun-hunut 18:1-8, 19:1-3

Uisneno of anfee hukun neu tuaf-tuaf re' anmakoin nok es, re' in ka fee ja fa, ai' in ka moen ja fa.

⁵ Kais mikoman roit. Mes hi ro he mmoin nok saa' re' hi mmui' sin naan. Fin Uisneno na'uab am nak,

“Au ka neu he 'nikan ki fa.

Au ka neu he usaitan ki fa.”[✧]

⁶ Onaim amha'tain hi neekm ein naan, on re' matu'i mnak,

“Natuin Au Usi' he nturun ma nbaab kau,

onaim au ka umtau fa.

Natuin ka tiit fa tuaf es amsa',

re' bisa noik naan kau.”[✧]

Kais amtebi mfain mituin atoran rais pirsait amnaa', mes ampirsai piut meu Kristus

⁷ Kais amnikan hi a'naakt ein re' nanoni' niit ki Uisneno In Kabin ma Prenat sin. Mitenab mirek-reko' sin a'moink ein, ma mait i'tope' na'ko sin neek pirsait naan. Saa' re' sin npirsai je naan, es re':

⁸ Yesus Kristus naan, re' ka na'bani' niit fa.

Na'ko un-unu' fe', ntea oras ia, ma ntea nabarbaar,

In nabaar kuun.

⁹ Nok ranan naan, hi kais mitun-tuin ahaa noni' re' ansaan. Uisneno nha'tani nrair hi neekm ein, natuin In nakrira' nrair In nekan arekot neu ki. Ka natuin fa rasi nak hi mituin atoran rais bukaet ii. Atoran huma' re' naan, ka ma'upan ma ma'osa' fa.

¹⁰ Un-unu' fe'e te, anbi kintal Uisneno In Tenar Onen, anmui' mei fuat es he ntaon mu'it-turu'.

✧ **13:5** Surat re' Nareta' Nafani' Raan A'honis 31:6,8, Nai' Yosua 1:5 ✧ **13:6** Siit Pures-Bo'is sin 118:6

A'naak rais pirsait re' natuut ein anbin naan anmu'in hak he nbukae sisin re' anbin mei naan. Mes oras ia, hit tmui' mei 'teta'.* Ma a'naak rais pirsait huma mnaa' ka nmui' fa hak he nbukaen anbin naan. ¹¹ Unu' fe'e te, toon-toon ate, a'naak rais pirsait sin a'naak ko'u, neik naa mu'it he ntao goe neu Uisneno In Ke'en Akninu' nneis-neis. Nok ranan naan, Uisneno nnikan nain sin saant ein. Rarit sin neik mu'it naan ma nout goe anbi kuan ee kotin.✧ ¹² On naan amsa' Nai' Yesus. In njair fua'-turu' he Uisneno bisa nnoes nain mansian ii saant ein. Oras In napein ha'mu'it naan, sin nheer neik Je, ma na'maet Je anbi kota Yerusalem in kotin. ¹³ Nok ranan naan, iim arkit atnao teu Nai' Yesus, he hit tpirsai Je piut-piut. Maski tuaf ankana'paar kit imsa', hit ro he tabarab he ttoup on re' Nai' Yesus. ¹⁴ Fin hit suma tatua ttaahn ahaa atbi pah-pinan ia. Mes hit tharap he tatua ma tamaik atbi kota fe'u es et sonaf neno tunan tar antea nabar-baar. ¹⁵ Natuin Nai' Yesus anjair fua'-turu' neu kit, es naan ate, hit ka tperluu fa he teik mu'it antein teu Nai' Yesus. Mes anmui' fua'-turu' 'teta' re' hit ro he teik je teu Uisneno, es re' siit pures-bo'is re' naikas ma na'ratan In kanan. ¹⁶ Ma kais amnikan he mmoe' 'moe' reko ma rais reko meu tuaf bian. Karu sin nperluu saa' ate, amturun ma mbaab sin. Naan anjair on re' fua'-turu' re' anharineb Uisneno In nekan.

* **13:10** Anmui' tuaf nak, re' ia anmatoom nok mei toras akninu'. Te kaah, ka on fa naan. Mei re' ia, nakrira' Usif Yesus in a'maten anbi hau nehe. Hit tharas a'turu' naan nok hit tasaeb siit pures-bo'is piut-piut teu Uisneno. Amkius era' 15. ✧ **13:11** A'naak Rais Pirsait ein sin Atoran 16:27

¹⁷ Hi ro he mneen ma mitniin tuaf-tuaf re' sin n'urus ki. Sin npafa' ma npanat hi smaanm ein fai-manas. Sin of nataah sin 'meupk ein naan anbi Uisneno In human ma In matan. Onaim amneen mirek-reko' meu sin, he sin bisa nmo'en ma natoon saa'-saa' nok neek marine. Kais-kaisa' sin natoon saa'-saa' nok neek akrati' ma asusat, natuin hi misaitan Yesus Kristus In raan a'honis amneot. Nok ranan naan, hi ka mipein fa upan amtein.

Atui surat re' ia nasaeb sukuur, ma n'onen ma nteek atoin Ibranis sin

¹⁸ Amturun ma mbaab kai piut-piut ambi onen-totis ma mteek kai. Fin hai neekm ein batuur namneon, ma hai mromi msa' he mmoe' rais reko piut. ¹⁹ Anneis-neisi nteni', am'onen he au bisa 'fain 'uum rabah 'eu ki.

²⁰⁻²¹ Uisneno naan, es re' ntaininab naan hit nekak. Au 'toit Je he nturun ma nbaab ki, he hi bisa mmoe' mituin In roimn ein ok-oke'. Au 'toti msa' he In nturun kit arkit, he hit bisa tjair tuaf-tuaf re' bisa nharineb In nekan. Natuin Uisneno npake nrair Yesus Kristus In naa' re' nat'oop, he nahake' rais manba'an fe'u neu kit. Rais manba'an naan, nanaob on piut tar nabar-baar. Rarit Uisneno namonib nafani' hit Usi' Yesus Kristus re' naan. Oras ia, Nai' Yesus anpairoir ma natuuk kit on re' atuuk reok goes. Es naan ate, hit taikas ma ta'ratan In kanan, ma tbo'is ta'naeb Ee piut-piut. Naan ro batuur, tua!

Saloom

²² Aok-bian manekat arki! Au 'toit he hi mtoup reko au faineekt ein ia nok neek marine. Natuin surat re' ia, suma paar aah. ²³ Anmui' beno re'

au 'roim he hi arki mihiin ok-oke'. Beno naan es re': hit aok-bian nai' Timotius anpoi nrair na'ko bui. Karu in neem rabah neu kau, hai nua kai of meit imkius ki.

²⁴ Au 'sonu' haan tabes ma haan buseet neu a'naakt ein, ma haan tabes neu apirsait ein neu Yesus Kristus. Aok-bian sin na'kon propinsi Itali msa' ansoun ein haan tabes ma haan buseet.

²⁵ Au 'toit he Uisneno naruru' ma nakrira' In nekan arekot neu ki ar-arki.

On re' naan, tua!

**Uisneno In Kabin ma Prenat: Rais Manba'an
Fe'u nok Reta' Ahun-hunut
Genesis and the New Testament in the Amarasi
language of Indonesia
Kejadian dan Perjanjian Baru dalam bahasa Amarasi
dari**

copyright © 1999-2014 Unit Bahasa dan Budaya, Kupang NTT, Indonesia

Language: Amarasi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 30 Nov 2021

60603d94-9a14-5831-a729-e3ba7b0ebc25